

# Apokalupo

## Apokalupo vaġa-foforina guruġari

Apokalipsis (o Apokalupo) Grik garo ai anina ta tu “vevaġa-fofori”. Mai buka tu Ioane na etoreato ekalesia doġorori imaima ruarua (7) ema Iesu ġevaġa-moġoniani tarimari tanobara mabaranaġi ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanaġi etoreato. Mai buka tu laġani 90 ema 96 fakari nuġanaġi ta etoreato, mo tu Iesu maki emaseto murinaġi vau.

Siri baregori mai Apokalupo bukana nuġanaġi tu karao 1:19; 21:5.

Iesu na Ioane ekiraġiatio, mai buka etoreato korana tu, Iesu ġena ura kara ġoirai dori ġeġorani dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei iraurauri tata bene vaġa-foforiri ġana uranaġi; 2) Asia Keina (o Minor) ai ekalesia doġorori imaima ruarua (7) moġeri bene kirari, e bene launaġiri, ema ġevei-rakavato-ġoi nai bene kira-feifeiri ġana; 3) Genese ai vevaġa-maġuri bioġana Barau na ekiraġiatio moġa dokona bemoġonini e bevetore-korikorini bene vaġa-fofori ginikaua ġana.

Ioane na mai Apokalupo bukana tu maiġesi eboioġaiatio:

1. Keriso Barau na mareva baregona eviniatio varina - karao 1
2. Keriso vetuġunaġi ġauveiri maitoma eveirini - karao 2-3
3. Keriso ġena kokore varina - karao 4-22

## Ioane ġena mata-vanaġi guruġari

**1** <sup>1</sup>Mai toretore maiġa tu Iesu Keriso ġenaġi Barau na kara evaġa-foforiatio guruġana. Barau na eviniatio, korana tu euratio, Iesu na ġena vetuġunaġi tarimari dori moġo ġeġorani dagarari bene vaġa-ribari ġana. Keriso na aneru etuġuatio, ġena vetuġunaġi tarimana Ioane evaġa-ribaiatio. <sup>2</sup>Ioane na Barau ġena guruġa ema Iesu Keriso ġena vevarifiu eġitarito dagarari mabarari evari-fiurito. <sup>3</sup>Mai peroveta guruġari beiaviani tarimana tu beverereni, ema mai peroveta guruġari, Ioane na etorerito maiġeri, beġe seġaġirini ema beġe korana-iaġirini tarimari maki beġe verereni. Korana mai dagara mabarari beġe ġorani ġarona tu varau beraġasi-rakava.

**Ioane ġena vevaġa-namo guruġana ekalesia  
doġorori imaima ruarua (7) ġeri**

<sup>4</sup>Au Ioane, Asia tanobaranai ekalesia doġoromi imaima ruarua (7) atore-vinimini: Varevare-bara e maino tu ġomi ġemi ai bene tanu. Mo varevare-bara e maino tu etanuni, etanuto, ema ma beiaġomani Barauna ġenana eiaġomani, ema iauka imaima ruarua (7) Barau ġena terona ġoiranai ġeruġani ġerina eiaġomani, <sup>5</sup>ema Iesu Keriso ġenana eiaġomani. Ġia tu Barau ġena guruġa evaġa-moġoniani ema evaġa-foforiani ma vetuġamaġikauna ġesi. Ġia tu mero guinena mase na evariġisi-ġenoġoito, ema ġia tu tanobara vereri mabarari ġeri Vere.

Ġia na eura-vinirani e ġera rakava rarana na eġuriġi-fitoġarito, <sup>6</sup>benamo Barau ġena Basileia doġorona tarimarai evaġa-iaġorato, ema Rubu Veaġa vereri ai evaga-iaġorato, ġia Tamana e ġena Barau vetuġunaġina bitana iaġo-vini ġana. Ġia ġenai mareva baregona e seġuka bene tanu vanaġivanaġi! Amen.

<sup>7</sup>Ġoġitaia, ġia tu magube nuġana na eiaġomani, mata mabarari na beġe ġitaiani, ġegwanuato tarimari na maki. Ema tanobara tarimari mabarari ġia koranai beġe taġi-rakavani. Mo tu moġoni. Amen.

<sup>8</sup>Vereġauka Barau ekirani, “Au tu Alefa ema Omega, (giniguinena ema dokona), atanuni, atanuto, e ma baiaġomani, Iaru-korokoro Barauna.”

**Keriso Ioane ġenai eforito**

<sup>9</sup>Au Ioane, ġomi tarikakami ema Vereġauka ġena ġauvei tavei-vegogoani tarimagu. Au tu ġomi ġesi Iesu ġena maġuri nuġanai tamidigu-midigu sebonani, e Barau ġena Basileia nuġanai tatanu-sebonani, ema meto nuġari ai tavevaġa-gwaġiġini e taruġa-gwaġiġini. Au Barau ġena guruġa aġobata-iaġiani ema Iesu varina guruġari avaġa-moġonirini e akiraġi-foforirini ġaramanai tu, Patmos motumotunai ġea tore-raga-kwaneguto. <sup>10</sup>Vereġauka ġena ġaro ai Barau laukana na eboroġiguto, benamo murigu ai garo baregona ta noġa moġo dudu guruna kavana aseġaġiatio. <sup>11</sup>Mo garo tu maiġesina ekirato: “Kara boġitarini dagarari bukai bono tore-vanaġiri, benamo mai ekalesia doġorori imaima ruarua (7) maiġeri ġeri bono tuġu-iaġori: Efeso, Smena, Pegamo, Taiatira, Sadis, Filadelfia ema Laodikea ġeri.”

<sup>12</sup>Aruġa-kureto, deikara na au evaġa-guruġaguto naġitaia ġana, benamo au na golo na lamefa torekauri ġeveirito dagarari imaima ruarua (7) aġitarito. <sup>13</sup>Mo lamefa torekauri dagarari vekaravari ai tu tarima ta noġa moġo Tarimarima Natuna kavana, ġena dabuġa tu mauka kenene evariġoto mo kwakuna fanafanana, ema kobana tu golo beletana na etore-ġeġeraġiatio. <sup>14</sup>Ġia debana ema ġuina tu kurokuro vulu kavana, snou noġa kuro-ġarogaro, ema matana tu karava moreri noġa moġo

ekimore-kimoreato-ḡoi. <sup>15</sup>Ḡia kwakuna fanafanana tu auri boraborari karava na ḡegaburini, benamo ḡevei-ginikaurini nai ḡeveḡia-veḡiani kavana. Ma garona tu ḡaruka vovoka ḡeḡaru-gwadani gururi kavana. <sup>16</sup>Ḡia ḡimana aroribanai tu visiḡu imaima ruarua (7) eḡabirito, ma bokana na tu vetari baḡana matana reketa-reketa raga-rakava-rakava eraka-rosito. Ḡia ḡoirana ḡitaḡitana tu ḡarogota kirikiri, ḡaro etorani mamana kavana.

<sup>17</sup>Au na aḡitaiato nai, kwakuna koranai aketo-tarito mase tarimana ta noḡa moḡo. Benamo ḡia ḡimana aroribana au iatagu ai etore-kauato, bena ekirato, “Asi nogari! Au tu giniginena ema dokona. <sup>18</sup>Au tu maḡuri atanuni. Amaseto, senaḡi toma au tu maḡuri batanu-vanaḡi vanaḡini. Ema Mase e mase tarimari iaukari ḡetanuni Gabuna (o Hades) kina tu au ḡegu ai. <sup>19</sup>Moḡesina naima mai oḡitarini dagarari mabarari bono tore-vanaḡiri, mai tu initoma ḡetanuni dagarari ema ḡoirai vauro beḡea ḡorani dagarari. <sup>20</sup>Mai visiḡu imaima ruarua (7) au ḡimagu aroribanai boḡitari ema lamefa torekauri dagarari golo na ḡeveirito imaima ruarua (7) anina vekuretoḡana tu maḡa: Visiḡu 7 tu ekalesia doḡorori 7 ḡeri aneru. Ma golo na lamefa torekauri ḡeveirito dagarari 7 tu ekalesia doḡorori 7.”

#### Vevaḡa-riba guruḡana Efeso ai ekalesia doḡorona ḡena

**2** <sup>1</sup>“Efeso ai ekalesia doḡorona ḡeri aneru tu maḡesi bono tore-vinia: Ḡimana aroribanai visiḡu imaima ruarua (7) eḡabi-taḡorini ema golo na lamefa torekauri ḡeveirito dagarari 7 vekaravari na erakaoni tarimana ḡena guruḡa tu maḡeri. <sup>2</sup>Goi ḡemu veḡa namori, ḡemu ḡauvei nuḡanai ḡemu vekwaraḡi ema ḡemu vevaḡa-gwaḡiḡi tu au ma ribagu. Ema au ribagu, tarima rakavari ḡoi na asi boḡabi-raḡerini, ema asi apostolo tarimari, senaḡi tauḡeri moḡo apostolo tarimari ai ḡevevaḡa-iaḡoni tarimari, maki ḡoi na otovo-naḡirito, benamo oribarito ḡia tu ḡofaḡofa tarimari. <sup>3</sup>Au aragu ḡaramanai meto oḡoitaḡoto, senaḡi ovevaḡa-gwaḡiḡito ema okokoreto, asi kota maki oruḡa-moirato.

<sup>4</sup>Senaḡi mai dagara sebona moḡo ḡemu ai asi aura-viniani: Tovotovonai ḡemu veuravini baregona au ḡegu ai otoreato-ḡoi, moḡa tu oiaḡuiato. <sup>5</sup>Bono tuḡamaḡi-ḡenoḡoi, ḡoi tu kamasi oḡabi-raḡeguto, ma boketo tu ainai mani boa raḡasi! Ḡemu rakava ḡenana bono vetuḡamaḡi-kure, be tovotovonai oveirito-ḡoi veḡari ma bono veiri. Bema asi bovetuḡamaḡi-kureni ma asi boraka-kureni nai, au tu baiaḡosini, benamo ḡemu lamefa vaḡa-ruḡakauna dagarana gabuna na basi ḡabi-veḡitaiani. <sup>6</sup>Senaḡi ḡoi ḡemu namo tu Nikolaita tarimari ḡeri veḡa rakavari asi oura-vinirini. Moḡeri veḡa tu au na maki asi aura-vinirini.

<sup>7</sup>Ma seḡana tarimana na Iauka Vevaḡa na ekalesia doḡorori kara ekiravara-vinirini guruḡari tu bene seḡaḡiri. Bekokoreni tarimana tu au

na maoro baviniani, ġia maġuri ġauna, Barau ġena paradaiso ai etubuni dagarana, ġwaġwana beġaniani.”

### **Vevaġa-riba guruġana Smena ai ekalesia doġorona ġena**

<sup>8</sup> Smena ai ekalesia doġorona ġeri aneru tu maiġesina bono tore-vinia: “Giniguinena ema dokona, e emaseto benamo ma emaġuri-ġenoġoito tarimana ġena guruġa tu maiġeri: <sup>9</sup> Ġoi meto ema midigumidigu oġoitaġoni au ma ribagu, ema asi ġemu asi ġamu maki au ma ribagu. Senaġi moġoni veġata ġoi tu farefare vovoka tarimamu! Mani tauġeri moġo ġevekiraġini Iuda tarimari ġetoni tarimari na ġoi iatamu ai guruġa rakavari ġekiraġirini guruġari tu au ma ribagu. Ġia tu dia Iuda tarimari korikori, a ġia tu Satani ġena doġoro tarimari. <sup>10</sup> Ġoirai midigumidigu tari dori oġoitaġorini, senaġi mo midigumidigu gariri asi bono vei. Bono ġitaia, ġomi kotari tu Diabolo na betovo-naġimini, be diburai betoremini, benamo monai ġaro gabanana (10) boġo midigu-midiguni. Monai maki enabe bomaseni, senaġi ġemu vetuġa-maġikau au ġegu ai tu bene tanu. Moġesina boveini nai tu, maġuri koronana bavinimuni.

<sup>11</sup> Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri. Bekokoreni tarimana tu mase vaġa-ruaruana na asi bevaġa-rakavaiani.”

### **Vevaġa-riba guruġana Pegamo ai ekalesia doġorona ġena**

<sup>12</sup> “Pegamo ai ekalesia doġorona ġeri aneru tu maiġesina bono tore-vinia:

Gena vetari baġana matana reketa-reketa ma ragari tarimana ġena guruġa tu maiġeri: <sup>13</sup> Au ribagu ġoi ainai otanuni. Ġoi tu Satani ġena vere seana evaġa-ruġa-tariato vanuġanai otanuni. Senaġina ġoi na au aragu tu ma moġonimu ġesi okorana-iaġiani, ġemu veġabidadama au ġegu ai maki asi veġata oraga-kwaneato. Antipas ġomi ġemi vanuġa baregona nuġanai ġevaġi-maseato ġaronai maki, ġoi ġemu veġabidadama tu asi oraga-kwaneato. Antipas tu ma vetuġa-maġikauna ġesi au varigu evaġa-moġoniato-ġoi ema ekiraġi-foforiato-ġoi. Satani tu mani ġomi ġemi vanuġa baregona nuġanai etanuni. <sup>14</sup> Senaġi dagara tari ġoi ġemu ai maniġeri au na tu asi aura-vinirini. Tarima kotari ġoi rekemu ai maniġeri tu Balam ġena vevaġa-riba veġari roġo ġekorana-iaġirini. Balam na vevaġa-riba kerereri Balak eviniato nai, Isaraela tarimari eġorikau-darererito, bena rakava ġeveito, kwaivakuku ġevinirito bureġari ġeġanirito ema mata-boraġa veġari ġeveirito-ġoi. <sup>15</sup> Moġa kavana ġoi rekemu ai tarima kotari maniġeri maki Nikolaita doġoro tarimari ġeri vevaġa-riba ġofaġofa veġari ġekorana-iaġirini. <sup>16</sup> Ġovetuġamaġi-kure! Bema asiġina nai tu, au ġoi ġemu ai baiaġosi-ġarimoġini, benamo vetari baġana au murugu ai mainana basi vaġa-vevaġirini.

<sup>17</sup>Ma seġana tarimana na Iauka Veāġa na ekalesia doġorori kara ekiravara-vinirini guruġari bene seġaġiri. Bekokoreni tarimana tu, au na mana baviniani. Mai mana maiġa toma tu vekuretoġa etanuni. Ema ġia tu au na fore kurokuro na ta baviniani. Mo fore kurokuro na iatanai tu ara variġuna ta etoreato, mo tu ta asi beribani, beġabiani tarimana na moġo beribaiani.”

**Vevaġa-riba guruġana Taiatira ai ekalesia doġorona ġena**

<sup>18</sup>“Taiatira ai ekalesia doġorona ġeri aneru tu maiġesina bono tore-vinia:

Barau Natuna, matana tu karava moreri noġa moġo kimorekimore, ma kwakuna fanafanari tu auri boraborari karava na ġegaburini, benamo ġevei-ginikaurini nai ġeveġia-veġiani kavana, ġena guruġa tu maiġeri: <sup>19</sup>Ġemu ġauvei, ġemu veuravini ema veġabidadama, ġemu vetuġunaġi iaġovini ema vevaġa-gwaġiġi, ema toma ġauvei oveiani tu barego lelevaġi, tovotovonai oveirito-ġoi moġeri tu ovanaġirini. Moġeri mabarari aġita-iaġomarini, be ribagu.

<sup>20</sup>Senaġi mai dagara sebona ġoi ġemu ai maniġa tu asi veġata auravini. Ġoi tu Iesebel, tauġena moġo evekiraġini peroveta vavinena etoni maniġa, ġoi na tu oġabi-raġeani. Mani vavine ġena vevaġa-riba na au ġegu vetuġunaġi-iaġovini tarimari ġemata-boraġani ema kwaivakuku ġevinirini bureġari ġeganirini. <sup>21</sup>Au na ġia tu ġena taimi aviniato, mo mata-boraġa veġari na bene vetuġamaġi-kure ġana. Senaġi ġia tu asi veġata eurani bene vetuġamaġi-kure. <sup>22</sup>Moġa lorinaġi ġia tu genagena gabunai bafiu-kauani, monai bea midigu-midiguni. Ġia ġesi veġuravanaġi veġari ġeveini tarimari maki ġia ġesi midigumidigu baregona beġe ġabi-sebonaiani. Bema ġia Iesebel ġena veġura-vanaġi veġari na asi beġe vetuġamaġi-kureni nai tu, mo midigumidigu beġe ġabiani. <sup>23</sup>Ġia natuna maki au na bavaġi-maserini. Benamo monana ekalesia doġorori mabarari beġe ribani, au tu tarimarima nuġari iaġasiri ema ġeri tuġamaġi aragaġirini tarimagu. Ema ġomi tata maki ġemi veġa ilailari ai voimi bavinimini.

<sup>24</sup>Ġomi Taiatira ai ekalesia kotari tu Iesebel ġena vevaġa-riba rakavari asi ġokorana-iaġirini ema Satani ġena iaunega vekuretoġari, dobudoburi ġekiraġirini, tu asi ġoribarini. Ġomi mani ġemi tu avaġa-guruġa korikorimini, ġemi ai meto ta tu asiġina ġinavaġi batore-kauani. <sup>25</sup>Dagara baregona tu, mani kara ġemi ai maniġa, moġa boġono ġabigigitaria mo, au bana ġenoġoi-iaġoma.

<sup>26</sup>Bekokoreni ema au ġegu ura bekorana-iaġiani mo magona bea ġabiani tarimana tu, au na maoro baviniani, tanobara beseri beguine-iaġirini. <sup>27</sup>Ġia na tanobara beseri tu auri togoina na beġori-kaurini ma seġukana baregona ġesi, ma tano ġurori noġa bekwari-kira kirarini.

Au na ġia seġuka baviniani, Tamagu ġenana seġuka aġbiato ilailanai.  
 28Ema ġia tu au na laġani visiġuna baviniani, (mo seġuka vetoġana).  
 29Ma seġana tarimana na Iauka Veaġa na ekalesia doġorori kara  
 ekiravara-vinirini guruġari bene seġaġiri.”

**Vevaġa-riba guruġana Sadis ai ekalesia doġorona ġena**

**3** 1“Sadis ai ekalesia doġorona ġeri aneru tu maiġesina bono  
 tore-vinia:

Barau Iaukana imaima ruarua (7) ġia ġenai ġetanuni ema visiġu  
 imaima ruarua (7) eġabi-taġorini tarimana ġena guruġa tu maiġeri: Ġoi  
 na ġauvei oveirini tu au ma ribagu. Tarimarima na ġoi ġekiraġimuni,  
 ġekirani, “Mani ekalesia tu maġuri” ġetoni, senaġi korikorina ġoi tu mase  
 otanuni. 2Notataġa, ġemu ai veġabidadama maġurina kotuna moġo dori  
 emase-vaġini maniġea novaġa-kokorea. Korana au na ġoi ġemu ġauvei  
 aġoitaġoato dia roroġoto au ġegu Barau ġoiranai. 3Moġesina naima Vari  
 Namona ġoseġaġiato ma ġoġabi-raġeato maniġa boġono tuġamaġia ema  
 boġono korana-iaġia, be ġemi rakava ġerina ġovetuġamaġi-kure. Bema  
 asi botataġani nai, au ġemu ai noġa moġo lema tarimana ta kavana  
 baiaġosini. Be kamara taimi ai basi raġasini, moġa tu asi kota maki  
 boribaiani.

4Senaġi ġoi ġemu tarima kotari Sadis ai maniġeri, ġeri dabuġa asi  
 kota maki ġevaġa-miro-kararito. Ġia maniġeri tu au ġesi baġa rakao-  
 rakao vegogoni, ma dabuġa kurokurori baġa riġorini, korana ġia ġeri  
 veiġa tu iobukaiobuka bene. 5Bekokoreni tarimana tu ġia kavari dabuġa  
 kurokurori na bavaġa-dabuġaiani. Au na ġia arana maġuri bukana na asi  
 barumu-fitoġaiani, a au Tamagu ma ġena aneru ġesi ġoirari ai ġia arana  
 bakiraġi-foforiani.

6Ma seġana tarimana na Iauka Veaġa na ekalesia doġorori kara  
 ekiravara-vinirini guruġari bene seġaġiri.”

**Vevaġa-riba guruġana Filadelfia ai ekalesia doġorona ġena**

7“Filadelfia ai ekalesia doġorona ġeri aneru tu maiġesina bono  
 tore-vinia:

Davidu ġena ki, (vevaġa-maġuri kina), eġabi-taġoani tarimana, tarima  
 veaġana ema moġoni korikorina. Ġia na kara bekeo-fakaiani, tarima ta  
 na asi ma bekou-ġauani riba, ema bekouani dagarana ta na asi ilaila ma  
 bekeoani riba. Mai tarima ġena guruġa tu maiġesina: 8Ġoi ġemu ġauvei  
 oveirini au ma ribagu. Noboġe, ġoiramu noġitaia, ġoi ġoiramu ġatama  
 bokana tu bakeo-fakaia, ma tarima ta asi ġena seġuka ma bekouani.  
 Au ribagu ġoi ġemu kokore tu misina moġo, senaġi au ġegu guruġa tu  
 oġabi-gigitariato, ema au aragu maki asi okira-ġuniġauato. 9Bono ġitaia,  
 mani Satani ġena rubu tarimari maniġeri tu tauġeri ġevkiraġini Iuda

tarimari ġetoni, senaġi ġia tu dia Iuda tarimari. Ġia maniġeri tu au na baġabi-iaġosirini, ġoi kwakumu koranai beġeasi tutuġu-tarini. Benamo beġe riba-maoroni, ġoi tu au na aura-vinimuni. <sup>10</sup>Ġoi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevotuni nai, ġoi tu baġitaġau-ginikaumuni. Mo veribaġani na tu mai tanobara iatanai ġetanuni tarimari mabarari batovo-naġirini. <sup>11</sup>Au tu dori aiaġosini. Kara oġabiato maniġa tu bono ġabi-gigitaria, be tarima ta na ġemu korona, ġemu kokore auna, asi bene ġabia. <sup>12</sup>Bekokoreni tarimana tu au Tamagu ġena Rubu Veaġana duġuna tarimanai bavaġa-iaġoani. Mo gabu asiġina ġinavaġi ma beiaġuiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ierusalemata variġuna tu au ġegu Barau ġena siti, ma mai siti maiġa tu guba na au Tamagu ġenana bemariġoni. Au aragu variġuna maki ġia ġenai batoreani.

<sup>13</sup>Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

#### **Vevaġa-riba guruġana Laodikea ai ekalesia doġorona ġena**

<sup>14</sup>“Laodikea ai ekalesia doġorona ġeri aneru tu maiġesina bono tore-vinia:

Guruġa moġoni korikorina ekiraġiani tarimana arana Amen ġenana eiaġosini. Ġia tu ma ġena vetuġamaġikau e Barau ġena guruġa evaġa-moġoni korikoriani ema ekiraġi-foforiani tarimana, ema Barau na eveirito dagaarari mabarari ġenana ġeiaġomato tarimana ġena guruġa tu maiġeri: <sup>15</sup>Goi ġemu ġauvei oveirini au ma ribagu. Au ribagu, ġoi tu dia faraka ema dia seġuka. Au ġegu ura sebona ġoi tu boro faraka moġo o boro seġuka moġo! <sup>16</sup>Senaġi ġoi tu seġuseġu, a dia seġuka moġo o dia faraka moġo. Moġesina naima ġoi tu au bokagu na bakanunu-fitoġamuni. <sup>17</sup>Goi tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavaġa-vegogori, be au tu ilaila, kara ta asi ma atuġamaġiani.’ Senaġi ġoi tu asi oriba-maoroni ġoi tu madi kekei ma vetuġamu, asi ġemu asi ġamu, ġoi tu mata-bubu ema asi dabuġamu, korimu. <sup>18</sup>Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evaġa-veveato, benamo momori mabarari tu ġeiarevarito. Be au ġegu ai mai golo bovoiani nai tu, botagaani. Ema dabuġa kurokurori maki bono voi, be bono vedabuġa-iaġi, kefimu korina maiakana bono kou-ġaua. Ema mata muramurana maki bono voi, be matamu ai bono torea, bena bono boġeboġe. <sup>19</sup>Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veiġa bono tuġamaġi-ginikaua, benamo bono vetuġamaġi-kure ma bono raka-kure.

<sup>20</sup>Noseġaġi! Au ġatama-bokai aruġa-taġoni ma afidifidini. Bema tarima ta na au garogu beseġaġiani, benamo ġatama-boka bekeo-fakaiani nai,

au baraka-toḡani, benamo ḡia ḡesi baḡa ḡaniḡanini ema ḡia maki au ḡesi beḡaniḡanini. <sup>21</sup>Bekokoreni tarimana tu au na maoro baviniani, au ḡesi ḡegu teronai baḡa tanuni. Au kavana, au akokoreto nai Tamagu ḡena teronai Tamagu ḡesi ḡatanuni.

<sup>22</sup>Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡi.”

### Barau ḡena terona gubai

**4** <sup>1</sup>Maiḡa murinai au aboḡe-iaḡoto tu, ḡatama-boka vekeofaka-taḡo guba vanuḡanai aḡitaiato. Benamo garo ta kibi guruna noḡa, mo tovtovonai aseḡaḡiato garona moḡa ekirato, “Maiḡana noma raḡe, be maiḡa murinai kara dori ḡeḡorani dagarari nama vaḡa-ḡitamu.”

<sup>2</sup>Asikauna Iauka Veaḡa na eboroḡiguto, benamo ḡoiragu ai tu tarima ta guba teronai etanu-taḡoto-ḡoi aḡitaiato. <sup>3</sup>Mo teronai etanu-taḡoto-ḡoi tarimana vetoḡana tu fore arana iaspa ḡekimore-kimorerini marevari, ema fore kakakakari arana kanelia marevari kavana, marevana tu irau moḡo. Ma mo terona tu kevau na eḡeḡeraḡiato. Mo kevau vetoḡana tu noḡa moḡo emeral forena kavana. <sup>4</sup>Mo terona moḡa tu terona gabana ruarua ma vasivasi (24) na ḡetore-ḡeḡeraḡiato. Ma mo terona 24 ai tu veḡitaḡau tarimari baregori tata ḡetanuto. ḡia mabarari tu dabuḡa kurokurori moḡo ḡeriḡoto, ema tata debari ai tu golo koronari sebori sebori ḡeveito. <sup>5</sup>Mo terona monana kiriku ekimoreato-ḡoi, garo baregori ema ḡaita eragato-ḡoi. Ma mo terona ḡoiranai tu lamefa imaima ruarua (7) ḡeḡarato-ḡoi. Mo lamefa ḡeḡarato-ḡoi moḡeri, mo tu Barau iaukana imaima ruarua (7). <sup>6</sup>Ema mo terona ḡoiranai maki davara veḡiaveḡiana, nega-vaḡuravaḡura aisi kavana.

Ma maḡuri dagarari vasivasi (4) tu nuḡana buroburonai, mo terona ḡeruḡa-ḡeḡeraḡiato. ḡia ḡoirari ema muriri tu matari tu ḡutuma. <sup>7</sup>Mo maḡuri dagarana guinena tu noḡa moḡo laion, vaḡa-ruaruana dagarana tu noḡa moḡo boromakau tauna, vaḡa-toitoina ḡoirana tu tarimarima kavana, ema vaḡa-vasivasina tu noḡa moḡo erovoni ugavana kavana. <sup>8</sup>Mai maḡuri dagarari maiḡeri tata faneri tu imaima sebona (6), ma mai faneri maiḡeri mabarari tu mata na moḡo ḡevonuto, faneri nuḡana rekeri dagarari maki mata moḡo. ḡia tu vanaḡivanaḡi boḡi-laḡani asi ḡeiaḡaraḡini, mai guruḡa maiḡa asi ḡevaḡa-ketoani, ḡekirani:

“Veaḡa, veaḡa, veaḡa,  
Vereḡauka, Barau tuḡutuḡu, tu veaḡa,  
guinenai etanuto-ḡoi,  
maitoma maki etanuni,  
ema ma beiaḡomani!”

<sup>9</sup>Mai teronai etanu-taḡoto-ḡoi tarimana tu maḡuri etanu-vanaḡi vanaḡini. Ma maiḡeri maḡuri dagarari na mo teronai etanu-taḡoto-ḡoi



tarimana ġevaġa-raġeato-ġoi, e ma vegubakauri ġesi ġetoma-rakarigoato-ġoi, ema ġetanikiu-viniato-ġoi nai, <sup>10</sup> mo veġitaġau tarimari baregori gabana ruarua ma vasivasi (24) tu mo teronai etanuni tarimana ġoiranai ġevetui-tarito-ġoi. Benamo mai maġuri etanu-vanaġi vanaġini tarimana ġetoma-rakarigo viniato-ġoi. Ġeri korona maki ġia ġoiranai ġetore-taririto-ġoi, benamo ġekirato-ġoi,

<sup>11</sup> “Ġai ġema Vereġauka ema Barau,  
 ġoi tu iaru-korokoro,  
 be tarimarima ema maġuri dagarari mabarari na ġoi tu beġene  
 vaġa-raġemu, beġene gubakaumu,  
 ema seġuka maki mabarana ġoi ġemu.  
 Korana dagara mabarari tu  
 ġoi na oveirito,  
 ema ġoi ġemu urai moġo oveirito  
 ema initoma ġetanuni.”

#### Mamoe natuna ema toretore fefana maukana

**5** <sup>1</sup> Benamo aboġeto, mo teronai etanu-taġoto-ġoi tarimana ġimana aroribanai tu toretore fefana maukana ta aġitaiato. Mo fefa tu tavita-tavita ma toretorena, ġeiokuato, ema vaġa-imaima ruarua (7) veġata ġekada-ġauato. Mo ġekada-ġaurito gaburi mabarari tu tabu vetoġana ġetoreato. <sup>2</sup> Ma gwada rakavarakava aneruna ta aġitaiato, garona tu asikeikeina eġobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?” <sup>3</sup> Senaġi tarima ta gubai o tanobarai o tanobara gaburenai ta asi ilaila veġata mo fefa bekeo-fakaiani ema nuġanai beboġe-ġurani. <sup>4</sup> Benamo ataġi-rakava rakavato, korana tarima sebona kwarikwari ta maki asi veġata ġeġoitaġoato, mo fefa maukana ma toretorena bekeoani ma nuġanai beboġe-ġurani. <sup>5</sup> Benamo mo veġitaġau tarimari baregori ta na ekiraguto, ekirato, “Asi notaġi! Noboġe! Iuda doġorona ġeri laion, Davida Natuna noġitaia, ġia tu ekokoreto. Ġia na mani fefa maukana ma toretorena bekeoani bene, ema mani ġekumuato kumukari taburi imaima ruarua (7) maki bekokirini bene.”

<sup>6</sup> Benamo aboġeto, Mamoe Natuna aġitaiato. Ġia tu terona nuġana buroburonai eruġa-taġoto-ġoi, mo maġuri dagarari vasivasi (4) ema veġitaġau tarimari baregori tu ġeruġa-ġeġeraġiato. Mamoe Natuna ġitaġitana tu tari na ġevaġi-maseato. Ġia guduna tu imaima ruarua (7) ema matana maki 7. Mo tu Barau iaukana 7 ekiraġirini. Ġia tu Barau na tanobara mabarana ġana etuġu-iaġorito. <sup>7</sup> Mamoe Natuna eiaġoto, benamo teronai etanu-taġoto-ġoi tarimana ġimana aroribanai mo fefa maukana ma toretorena moġa eġabiato. <sup>8</sup> Fefa maukana ma toretorena eġabiato nai, maġuri dagarari vasivasi ema veġitaġau tarimari baregori 24 Mamoe Natuna ġoiranai ġevetui-tarito. Ġia tata tu

ma ġeri hap (gita noġa) ema golo ġurori nuġari ai tu muramura goġuna ma bonari. Mo goġu ma bonari tu Barau ġena tarima veaġari ġeri ġauġau guruġari. <sup>9</sup>Benamo ġia na mari variġuna ta maiġesina ġemariato,

“Ġoi na fefa maukana ma toretorena boġabiani ilaila,  
ema ġia kumuna ma taburi maki bokeo-fakarini ilaila,  
korana ġoi tu ġevaġi-masemuto,  
ma ġoi raramu na tau vavine Barau ġena ovoi-vaġirito doġoro  
mabarari ġerina, e garo mabarari ġerina, ema bese mabarari ema  
tanobara mabarari na.

<sup>10</sup> Ġoi na ġia tu Barau ġena Basileia doġorona tarimari ai ovaġa-iaġorito,  
ema Barau vetuġunaġina beġene iaġo-vini ġana Rubu Veaġa vereri  
ai ovaġa-iaġorito.

Ġia tu tanobara mabarana iatanai beġe veġorikauni.”

<sup>11</sup> Ma aboġe-iaġoto, aneru garori asisebo-asisebo aseġaġirito. Moġeri aneru tu asi iavi-iaviri, milion ġutuma maki ġevanaġirito. Ġia na terona ema maġuri dagarari vasivasi ema veġitaġau tarimari baregori ġeruġa-ġeġeraġirito. <sup>12</sup> Ma mai mari ġemari-gigitariato,

“Mamoe Natuna,  
ġevaġi-maseato dagarana,  
tu ma ġena maoro, seġuka beġabiani,  
e farefare vovoka, e iaunega,  
ema kokore beġabiani!  
Ema ġia ma ġena maoro tarimarima mabarari na beġe gubakauani,  
ma beġe vaġa-raġeani  
ema beġe vonevone-raġeani!”

<sup>13</sup> Benamo Barau na eveirito dagarari mabarari guba nuġanai, tanobara iatanai, tanobara gaburenai, e davara nuġanai dagarari mabarari na mai mari ġevaisiato aseġaġirito,

“Teronai etanu-taġoni Barauna  
ema Mamoe Natuna,  
tauri ruarua na vevaġa-raġe,  
vegubakau, mareva baregona,  
ema seġuka beġene ġabiri,  
bene iaġo mo vanaġivanaġi asi magona!”

<sup>14</sup> Benamo maġuri dagarari vasivasi na ġevaġa-moġoniato, ġekirato, “Amen!” Ema veġitaġau tarimari baregori 24 ġevetui-tarito, Barau ġetoma-rakariġo viniato.

**Fefa maukana ma toretorena ġekumukaiato kadari  
o tabu vetoġari Mamoe Natuna na ekeorito**

**6** <sup>1</sup> Benamo au na Mamoe Natuna aġitaiato, fefa maukana ma toretorena vaġa-imaima ruarua (7) ġekada-tariato dagarana

kadana giniguinena ekeo-fakaiato. Moḡa ekeoato-ḡoi nuḡanai tu, maḡuri dagarari vasivasi fakari ai ḡia ta eguruḡato, garona tu noḡa guba eguruato, ekirato, “Noiaḡoma!” <sup>2</sup> Aboḡe-iaḡoto nai tu, hosi kurokuroa ta aḡitaiato, eraḡeto tarimana ḡimana tu ma fevana, ema ḡia tu korona ta maki eviniato. ḡia eraka-rosito tu, vetari ai ekokoreto-ḡoi ema eiaḡoto tu ma bene kokore ḡana.

<sup>3</sup> Benamo Mamoe Natuna na kumuka vaḡa-ruaruana kadana ekeo-fakaiato nai, maḡuri dagarana vaḡa-ruaruana aseḡaḡiato, ekirato, “Noiaḡoma!” <sup>4</sup> Benamo hosi ta ma eraka-rosito. Moḡa tu hosi kakakakana. Eraḡeto tarimana tu seḡuka eviniato, tanobara na maino bene ḡabi-veḡitaia, be tarimarima tauḡeri beḡene vevaḡi-masemase ḡana. Mo tarima tu vetari baḡana asikeikeina ta eviniato.

<sup>5</sup> Kumuka vaḡa-toitoina kadana ekeo-fakaiato nai tu, maḡuri dagarana vaḡa-toitoina aseḡaḡiato, ekirato, “Noiaḡoma!” Au aboḡe-iaḡoto nai, hosi dubadubana aḡitaiato, eraḡeto tarimana ḡimanai tu dagara ḡeri meto vaḡa-foforiri o sikele dagarana ta eḡabiato. <sup>6</sup> Benamo au na garo ta maḡuri dagarari vasivasi (4) fakari na eiaḡomato aseḡaḡiato, ekirato, “(Bita doḡe be), widi kilo sebona davana tu ḡaro sebona ḡauveina voina, ema bali (widi kavana) kilo toitoi davana tu ḡaro sebona ḡauveina voina. Senaḡi olive diḡana ema vine nanuna tu asi boḡono vaḡa-rakavari.”

<sup>7</sup> Ma Mamoe Natuna na kumuka vaḡa-vasivasina kadana ekeo-fakaiato nai tu, maḡuri dagarana vaḡa-vasivasina aseḡaḡiato, ekirato, “Noiaḡoma!” <sup>8</sup> Aboḡe-iaḡoto nai tu, hosi ta aḡitaiato, tauḡanina ḡitaḡitana noḡa kurokuro. Eraḡeto tarimana arana tu Mase, ma mase tarimari iaukari ḡetanuni Gabuna (o Hades) tu ḡia murina na eraganaḡi-raganaḡito-ḡoi. Tauri ruarua seḡuka evinirito, tanobara taviri vasivasi nuḡanai tavi sebona beḡene ḡita-ḡaua, be vetari ai, doḡe ai, keve rakavari na, ema boḡai ḡetanuni veḡaniveḡani dagarari na tarimarima beḡene vaḡi-maseri.

<sup>9</sup> Ma kumuka vaḡa-imaimana kadana ekeo-fakaiato nai tu, Barau ḡena guruḡa ḡaramanai, e mo guruḡa ḡevaḡa-moḡoniato ema ḡevari-fuato ḡaramanai ḡevaḡi-maserito tarimari iaukari maḡuri fata veaḡana gaburenai aḡitarito. <sup>10</sup> ḡia mabarari ḡekoḡo-baregoto, ḡekirato, “Vere tuḡutuḡu, ḡoi tu veaḡa ema moḡoni veḡata, aitoma vau ḡoi na tanobarai ḡetanuni tarimari bovaḡa-maoro vinirini, benamo ḡai rarama ḡevaḡa-riḡorito bovaḡa-voirini?” <sup>11</sup> Benamo ḡia mabarari tata dabuḡa kurokurori evinirito, ekirarito, negakota roḡo ma beḡene naritari etato. Beḡene vaḡa-noga mo, ḡia karori toma vetuḡunaḡi ḡeiaḡo-vinini tarimari ema tarikakari kotari, ḡia ḡevaḡirito kavana, beḡe vaḡi-maserini mo, ḡeri numera korikori bene ḡabia.

<sup>12</sup> Au na Mamoe Natuna aḡitaiato, kumuka vaḡa-imaima sebona (6) ekeo-fakaiato nuḡanai, tano-iaga asikeikeina eragato, e ḡaro eduba-dubato, dabuḡa

dubadubari noġa, e ġue evekurevoto, ekakarato rara kavana. <sup>13</sup>Ema guba na visiġu ġeketo-firiġoto tanobara ġana, noġa figi maġitari iavara na figi ġauna na eruku-keto ketorini kavana. <sup>14</sup>Guba maki erekwa-rekwato, noġa moġo fefa maukana, ġetoretore-iaġiani dagarana, ġeiokuani kavana. Ma ġoro ema motumotu mabarari gaburi ekoki-veġitarito. <sup>15</sup>Benamo tanobara kiniri, e vereri, e vetari ġitaġauna tauri baregori, e ġeri farefare asisebo tarimari, e kokore rakavarakava tarimari, tuġu-rakaorakao tarimari ema maġuri namona e fakanai ġetanuni tarimari, ġia mabarari kouġa nuġari ai ema ġoro ai fore baregori vekaravari ai ġea gumuto. <sup>16</sup>Benamo ġoro ema fore baregori ġenoġirito, ġekirato, “Ġai iatamai ġoma ketokau, ġoma lautarima, be teronai etanuni Barauna ġoirana ġenana ema Mamoe Natuna ġena baru baregona ġenana ġoma kure-toġama! <sup>17</sup>Korana ġia ġeri baru ġarona baregona tu varau bevotu, deikara beruġa-tarini riba?”

### Barau ġena vetuġunaġi tarimari 144,000

**7** <sup>1</sup>Moġa murinai aneru vasivasi (4) aġitarito, tanobara daiguniri vasivasi ai ġeruġato. Mo aneru na tu tanobara iavarari vasivasi ġelautaririto, tanobarai e davarai asi beġene raga, ema ġau maki asi beġene kwari-ġarevari ġana. <sup>2</sup>Ma murinai tu aneru ta ma aġitaiato, ġaro eraġeni rekena na emaraġeto. Mo aneru na maġuri Barauna ġena vevaġa-moġoni vetoġana o makana eġabi-taġoato-ġoi. Ġia na mo aneru vasivasi, Barau na seġuka evinirito tanobara ema davara beġene vaġa-rakavari aneruri, efarara-vinirito, ekirato, <sup>3</sup>“Tanobara, davara, ema ġau asi roġo boġono vaġa-rakavari, bene iaġo mo, Barau ġena vetuġunaġi tarimari bakuri ai ġia ġena vetoġa baġana toreri murinai vau.” <sup>4</sup>Moġa murinai Barau ġena vetoġa bakuri ai ġetorerito tarimari mabarari tu 144,000 aseġaġiato. Ġia tu Isaraela doġorori gabanana ruarua (12) mabarari ġerina, doġorori tu maġeri:

- <sup>5</sup> Iuda ġena doġoro tarimari - 12,000
- Reubena ġena doġoro tarimari - 12,000
- Gad ġena doġoro tarimari - 12,000
- <sup>6</sup> Asere ġena doġoro tarimari - 12,000
- Naftali ġena doġoro tarimari - 12,000
- Manase ġena doġoro tarimari - 12,000
- <sup>7</sup> Simeona ġena doġoro tarimari - 12,000
- Levi ġena doġoro tarimari - 12,000
- Isakara ġena doġoro tarimari - 12,000
- <sup>8</sup> Sebulun ġena doġoro tarimari - 12,000
- Iosefa ġena doġoro tarimari - 12,000
- Beniamina ġena doġoro tarimari - 12,000

### Tarima ġutuma lelevaġi dabuġa kurokurori ġeveito

<sup>9</sup>Moġa murinai aboġe-iaġoto, tarima ġutuma lelevaġi, asi tau iaviġosina, aġitarito. Mo tu tanobara irauirau mabarana tarimana, e

doḡoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ĝia mabarabarari tu terona ema Mamoe Natuna ĝoirari ai ĝeruḡato. Ĝia mabarari dabuḡa maukari kurokurori ĝeveito, ema ĝimari ai tu galamo lauri noḡa dagarari ĝeḡabito. (Mo tu ĝia ĝeri kokore vetoḡari). <sup>10</sup> Ĝia ĝekoḡo-baregato, ĝekirato, “Vevaḡa-maḡuri tu ĝita ĝera Barau, teronai etanukauni Barauna, e Mamoe Natuna ĝerina eiaḡomani.” <sup>11</sup> Ma aneru mabarari na tu terona e veḡitaḡau tarimari baregori ema maḡuri dagarari vasivasi (4) ĝeruḡa-ḡeḡeraḡirito. Benamo Barau ĝena terona koranaĭ ĝevetui-tarito, ĝoirari tano ai, Barau ĝetoma-rakarigo viniato, <sup>12</sup> ĝekirato, “Moḡoni veḡata! Vevaḡa-raḡe, e mareva baregona, e iaunega, e vevaḡa-namo, e vegubakau, e seḡuka, ema kokore tu ĝita ĝera Barau ĝena toma bene iaḡo vanaḡivanaḡi, Amen!

<sup>13</sup> Benamo veḡitaḡau tarimana baregona ta na edanaḡiguto, ekirato, “Mai dabuḡa kurokurori na beḡe vedabuḡa tarimari tu deikara, ema ĝia tu ainana beḡe iaḡoma?” <sup>14</sup> Benamo avaḡa-veseto, akirato, “Ĝegu vere, au asi ribagu. A ḡoi tu ribamu.” Benamo ĝia na ekira-varaguto, ekirato, “Mai tarima maiḡeri tu midigumidigu baregori nuḡari na ĝeiaḡomato. Ĝeri dabuḡa tu Mamoe Natuna, ginitaḡo mamoenā, rarana na ĝevei-kurokuro-rito. <sup>15</sup> Moḡesina naima, ĝia tu Barau ĝena terona ĝoiranaĭ ĝeruḡani, ema ĝena Rubu Veaḡa nuḡanaĭ boḡi-laḡani ĝia vetuḡunaḡina ĝeiaḡo-vinini. Ema teronai etanuni Barauna na enari-ḡaurini. <sup>16</sup> Ĝia tu asi ma beḡe vito-ḡenoḡoirini, e bokari asi ma beḡe koke-ḡenoḡoini. Ĝaro iatari ai asi ma bekirini ema ḡaro seḡukana na asi ma begugurarini. <sup>17</sup> Korana terona nuḡanaĭ etanuni Mamoe Natuna na beḡita-ḡaurini. Ĝia na beḡori-iaḡorini maḡuri nanuna eḡaruani gabuna ḡana. Ema Barau na matari gorari mabarari bedau-vaḡirini.”

### Kumuka vaḡa-imaima ruaruana (7) kadana

**8** <sup>1</sup> Mamoe Natuna na kumuka vaḡa-imaima ruaruana (7) kadana ekeo-fakaiato nai, guba vanuḡanaĭ aoa tavina ta veḡata guru ta maki asi eraḡeto. <sup>2</sup> Benamo Barau ĝoiranaĭ ĝeruḡato aneruri imaima ruaruana (7) aḡitarito, dudu 7 evinirito.

<sup>3</sup> Benamo aneru ta ma eiaḡomato, fata veaḡana sevinai eruḡato, ĝimanai tu golo ḡurona ta. Ĝia tu muramura ma bonana barego lelevaḡi ĝeviniato, Barau ĝena tarima veaḡari ĝeri ḡau-ḡau ĝesi terona ĝoiranaĭ golo fatana veaḡanaĭ Barau bene varevare-vinia ḡana. <sup>4</sup> Mo muramura goḡuna ma bonana goḡuna ema Barau ĝena tarima veaḡari ĝeri ḡauḡau ĝesi, mo aneru ĝimana na ḡevaraḡeto Barau ĝoirana ḡana. <sup>5</sup> Moḡa murinaĭ aneru na golo ḡurona eḡabiato, fata veaḡana karavana na evaḡa-vonuato, benamo tanobara iatana ḡana efu-riḡoato. Monana ḡaita guruna eraḡeto, garo gururi tari ḡeraḡeto, e kiriku eragato, ema tano eiagato.

### Aneru na ġeri dudu ġefurururito

<sup>6</sup>Benamo aneru imaima ruarua (7) ġeri dudu ġeġabi-torerito, beġene furururi ġana. <sup>7</sup>Aneru giniginena na ġena dudu efururuato, benamo aisi foreri misimisiri ema karava rara ġesi ġesebonato ġevetoreto. Benamo moġeri mabarari tanobara ġana ebubu-riġorito. Ma tanobara tavi toitoi nuġanai tavi sebona eġara-ġosiato, ġau toitoi nuġari ai tu sebori tu ġeġara-ġosirito, e ġauġa ema reġi mabarari ġeġara-ġosirito.

<sup>8</sup>Aneru vaġa-ruaruana na ġena dudu efururuato nai tu, dagara ta, ġoro-dagara-bara ta noġa ma karavana, davarai evefiu-reito. Benamo daġaru-bara tavi toitoi nuġanai tavi ta tu rarai eiaġoto. <sup>9</sup>E daġaru-bara maġuri dagarari toiri-toiri nuġari ai sebori tu ġemaseto, e bouti toiri-toiri nuġari ai sebori tu ġeburuto.

<sup>10</sup>Aneru vaġa-toitoina ġena dudu efururuato nai tu, visiġu-dagara-bara ta kere morena kavana guba na eketoto, benamo ġaruka toiri nuġari ai sebori ai, e ġeġaruġarurini nanuri ai eketo-reito. <sup>11</sup>Mo visiġu arana tu “Mamaki”. Nanu gaburi toiri nuġari ai sebori tu ġemamakito. Benamo tarimarima vovoka na mo nanu mamakiri ġeniurito nai ġemaseto.

<sup>12</sup>Aneru vaġa-vasivasina ġena dudu efururuato nai, ġaro e ġue ema visiġu tu taviri toitoiri nuġari ai tavi sebori tu ġesemorito, naima mo tavi toitoiri nuġari ai tavi sebori tu ġemukunato. Moġa lorinai ġaro mamana tavi toitoi nuġanai tavi sebona tu asi emamato, ema boġi tavi toitoi nuġanai tavi sebona ta ġue e visiġu tu asi emamato.

<sup>13</sup>Benamo aboġeto, ugava ta guba tuġuna vanigerenai erovoto-ġoi aġitaiato, maiġesi ekea-fararato, ekirato, “Tanobarai ġotanuni tarimami, vetuġami kika! Vetuġami kika! Vetuġami kika! Korana tu aneru toitoi, ġeri dudu roġosi ġere furururi aneruri, na ġeri dudu beġe furururini gururi ai tu, meto ema midigumidigu barego lelevaġina beġorani.

### Dudu vaġa-imaimana (5)

**9** <sup>1</sup>Aneru vaġa-imaimana na ġena dudu efururuato, benamo visiġu ta aġitaiato, guba na eketoto tanobarai. Mo visiġu tu guri variġo kwareġana, (iauka rakavari ġeri dibura), kina eviniato. <sup>2</sup>Mo guri ekeo-fakaiato nai tu, goġu evebubu-rosito noġa moġo karava baregona goġuna kavana. Benamo mo guri goġuna na ġaro mamana ema guba fakana emukuna-ġaurito.

<sup>3</sup>Goġu nuġana na madudu ġeraka-rosito tanobarai, ema seġuka evinirito, seġukana tu kavikavi seġukari kavana. <sup>4</sup>Ġia ekirarito, tanobarai ġauġa ta, e tanobarai ġetubuni dagarana ta, ema ġau ta asi beġene vaġa-rakavaia, senaġi deidei bakuri ai Barau ġena vetoġa o maka asi etanuni tarimari moġo beġene vaġa-rakavari etato. <sup>5</sup>Ekirarito maki, mo tarima asi beġene vaġi-maseri, senaġi ġue imaima (5) nuġanai beġene

vaġa-midigu midiguri. Mo midigumidigu ġeġanito moġeri tu kavikavi na tarima ekavirini midiguna kavana. <sup>6</sup>Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ġeri ura baregona ġemase beġe toni, senaġi mase ġerina beveġitani.

<sup>7</sup>Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana. <sup>8</sup>Ġuiri tu vavine ġuiri noġa moġo, doġari tu laion doġari kavana. <sup>9</sup>Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetari nuġanai ġeraka-toġani gururi kavana. <sup>10</sup>Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni. <sup>11</sup>Ġia tu ma ġeri vere baregona o kini. Ġia na eġita-ġaurini. Ġia dagarana tu mo guri variġo kwareġana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaġa-rakava kwaikwai tarimana).

<sup>12</sup>Rakava baregori giniginena tu bekoru moġa, ma ruarua tu vau beġe iaġomani.

#### **Aneru vaġa-imaima sebona (6) na dudu efururuato**

<sup>13</sup>Aneru vaġa-6 na ġena dudu ma efururuato, benamo fata veaġana daiguni vasivasi ai gudu vasivasi moġeri ġerina garo ta eiaġomato aseġaġiato. Mo fata tu golo na ġeveiato, ma Barau ġena terona ġoiranai etanuni. <sup>14</sup>Mo garo na aneru vaġa-6 na ma ġena dudu moġa ekiraiato, ekirato, “Aneru vasivasi, ġaruka baregona arana Eufrate ai ġebaru-taririto, moġeri noruġa-vaġiri.” <sup>15</sup>Benamo mo aneru vasivasi eruġa-vaġirito, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia. <sup>16</sup>Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato. <sup>17</sup>Mo hosi e iatari ai ġeraġeto tarimari au ġegu mata-vanaġi ai vetoġari tu maġesina aġitarito: Ġia kobari kouġauna ġana auri dabuġana tu karava ġeġarani kakakaka karavari kavana, e blu, ema karava moreri o salfa borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito. <sup>18</sup>Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiri-toiri nuġanai sebori-sebori tu ġevaġi-maserito. <sup>19</sup>Mo hosi ġeri seġuka tu bokari ai ema ġiġuri ai maki. Korana ġiġuri tu mota kavana, ma debari. Mo ġiġuri debari na tarimarima ġevaġa-midigu midigurito-ġoi.

<sup>20</sup>Tarimarima oreri, mo vevaġa-midigumidigu dagarari toitoi na asi ġevaġi-maserito tarimari, tu roġo asi ġevetuġamaġi-kureto ġimari

g̃auveiri g̃erina. Iauka rakavari toma-rakariḡori ema asi g̃eboḡeboḡeni e asi g̃eseḡaḡini ema asi g̃erakani kwaivakukuri, golo, silva, auri boraborari, fore e g̃au na g̃eveirito dagarari toma-rakariḡori asi g̃evaḡa-dokoato. <sup>21</sup>Ema g̃eri vevaḡideba, g̃eri meḡameḡa, g̃eri mata-boraḡa veḡari, ema g̃eri lema g̃erina maki asi g̃evetuḡamaḡi-kureto ma asi g̃eraka-kureto.

### Aneru ema toretore fefana maukana misina

**10** <sup>1</sup>Benamo aneru ta, kokore lelevaḡi aneruna, guba na ma emariḡoto-g̃oi aḡitaiato. G̃ia tu magube na g̃evaḡa-dabuḡa maukaiato, ma debana iatanai tu kevau ta. G̃ia g̃oirana tu g̃aro mamana noḡa, ema kwakuna tu karava g̃emoreni kavana. <sup>2</sup>G̃imanai tu toretore fefana maukana misina ta vekeo eḡabitaḡoato-g̃oi. G̃ia kwakuna aroribana tu davarai etoreato, ma kwakuna kaurina tu tanobarai etoreato. <sup>3</sup>Benamo eḡaba-baregoto, laion eniarani nai eḡabani kavana. G̃ia eḡabato murinai, g̃aita imaima ruarua (7) garori g̃eguruḡato, (g̃ia g̃evaḡa-veseato). <sup>4</sup>Mo g̃aita 7 g̃eguruḡato moḡeri dori atore-vanaḡirito, senaḡi guba na garo ta eiaḡomato, ekirato, “Mani g̃aita 7 kara beḡe kiraḡiri maniḡeri tu nokure-toḡari, asi bono tore-vanaḡiri.”

<sup>5</sup>Benamo mo aneru, davarai e tanobarai kwakuna etorerito aneruna, aḡitaiato, g̃imana aroribana eḡabi-vaisiato, guba vanuḡana eduḡiato, <sup>6</sup>benamo tanu-vanaḡivanaḡi Barauna aranai guruḡa-fofori gwaḡiḡina eveiato. Guba ema nuḡari ai g̃etanuni dagarari mabarari, e tanobara ema nuḡari ai g̃etanuni dagarari mabarari, ema daḡaru-bara ema nuḡari ai g̃etanuni dagarari mabarari tu g̃ia na eveirito. G̃ia aranai mai guruḡa-fofori gwaḡiḡina eveiato, ekirato, “Taimi varau bekori, Barau asi ma bevaḡa-nogani. <sup>7</sup>Senaḡina aneru vaḡa-imaima ruaruana (7) na g̃ena dudu befururuani neganai, Barau g̃ena guruḡa vekuretoḡari veḡari ema boioḡari beḡe ḡorani, g̃ena peroveta tarimari g̃eri ai ekiraḡi-foforirito ilailari ai.”

<sup>8</sup>Benamo guba na aseḡaḡiato garona na ma evaḡa-guruḡaguto, ekirato, “Noiaḡo, mo aneru davarai e tanobarai eruḡani aneruna, g̃imanai toretore fefana maukana evekeo-taḡoni, moḡea noḡabia.” <sup>9</sup>Benamo aiaḡoto, mo aneru akiraiato, mani toretore fefana maukana misina nevinigu atato. Benamo g̃ia na ekiraguto, ekirato, “Noḡabia, be noḡani-ḡosia! Bokamu ai mamina tu gode mamina maki bevanaḡiani, senaḡi nuḡamu tu bevemukini.” <sup>10</sup>Benamo toretore fefana maukana misina mo aneru g̃imana na aḡabiato, benamo aḡaniato. Aḡaniato mamina murugu ai tu gode mamina maki evanaḡiato, senaḡi aḡani-ḡosiato nai, nuḡagu tu evemukito.

<sup>11</sup>Benamo evaḡa-guruḡaguto, ekirato, “Tanobara beseri g̃utuma, garo iraurau tarimari ema g̃eri vere baregori o kini g̃eri ai karakara beḡe ḡorani dagarari ma bono peroveta-iaḡiri.”



### Vevaġa-moġoni tarimari ruarua

**11** <sup>1</sup>Benamo vaġa-vetovo ġauna ta, ġitaġitana togoi noġa, eviniguto, benamo ekiraguto, ekirato, “Noiaġo, Barau ġena Rubu Veaġa ema fata veaġana noa makaia, ema monai toma-rakariġo tarimari vira bono iaviri. <sup>2</sup>Senāġi mani Rubu Veaġa nuġanai Iuda tarimari ġeri toma-rakariġo gabuna maġuna murikana, maniġa tu bono iaġuia, asi bono makaia, korana maniġa tu irau bese tarimari ġeri (ġurigiuri gabuna) evinirito, ġia na mai vanuġa baregona veaġana ġue gabana vasivasi ma ruarua (42) nuġari ai beġe fanafana-tariani. <sup>3</sup>Au vaġa-moġonigu tarimari ruarua seġuka bavinirini, benamo ġaro mabarana 1,260 Barau na bevinirini guruġari beġe kiraġi-foforirini. Ġia tu fuse-dabuġari na beġe vedabuġani.”

<sup>4</sup>Mai vaġa-moġonigu tauri ruarua tu mo olive ġauri ruarua ema mo lamefa torekauri dagarari ruarua, tanobara Verena ġoiranai ġeruġani moġeri. <sup>5</sup>Bema tarima ta na nevaġa-rakavari betoni nai tu, bokari na karava beġe raka-rosini, benamo inairi beġe vaġa-buataririni. Ġia ġevaġa-rakavari beġe toni tarimana tu moġesina bemaseni. <sup>6</sup>Maiġeri tarima ruarua tu ma seġukari guba beġe kou-ġauani, benamo ġia peroveta guruġari beġe kiraġirini ġarori ai tu, ġura asi beraguni. Ema ma seġukari maki, nanu beġe kurevoani, rarai beiaġoni, e beġe urani ġarori ai tarimarima vaġa-midigumidiguri dagarari irauirau tanobarai beġe vaġa-ġorarini.

<sup>7</sup>Geri vevarifiu beġe vaġa-magoani ġaronai, vevaġa-rakava dagarana guri variġo kwareġana, (iauka rakavari ġeri dibura), nuġana na berakarosini, benamo ġia bevaġa-vevaġirini. Ġia ġeri seġuka bevanaġiani, benamo bevaġi-maserini. <sup>8</sup>Benamo ġia tauġaniri tu vanuġa baregona dabarana nuġanai gena-fitari beġe tanuni. Guruġa veabanaġinai mo vanuġa barana arana ġekiraġiani tu Sodoma ema Aigupito. Ġia tauri ruarua ġeri Vereġauka tu mo vanuġai ġevaġa-satauroato. <sup>9</sup>Ġaro toitoi ma kwana nuġari ai bese irauirau, doġoro irauirau, garo irauirau, e tanobara irauirau tarimari ġia tauġaniri beġe ġitarini, senaġi guriguriri tu asi beġe urani. <sup>10</sup>Ġia ġeri mase dainai tanobarai ġetanuni tarimari tu beġe iakuni, beġe ġani-vegogoni e karori tata ġeri varevare beġe tuġuni; korana tu mai peroveta tarimari ruarua na tanobarai ġetanuni tarimari ġeri ai midigumidigu baregona ġevaġa-ġoraiato.

<sup>11</sup>Senāġi mo ġaro toitoi ma kwana ġekorito murinai, maġuri iaġana Barau ġenana ġia tauri ruarua nuġari ai eraka-toġato, benamo ġeruġa-vaivaito. Ġia tauri ruarua ġeġitarito tarimari mabarari ġegari-rakavato. <sup>12</sup>Benamo vevaġa-moġoni tauri ruarua na garo baregona ta ġeseġaġiatio, guba na emariġoto, ġia evaġa-guruġarito, ekirato, “Maġana ġomaraġe!” Benamo tauri ruarua magube ta nuġanai guba ġana ġevaraġeto, ġari inai

tarimari ġoirari ai. <sup>13</sup>Mo aoa nuġanai moġo tano-iaga baregona eragato, benamo vanuġa baregona taviri gabanana (10) nuġanai tavi sebona tu evaġa-mouato, ma tarima mabarari 7,000 ġemaseto. Senaġi tarimarima oreri tu ġegari-rakavato, benamo Guba Barauna ġevaġa-raġeato.

<sup>14</sup>Rakava vaġa-ruaruana tu bekori moġa, senaġi vaġa-toitoina tu dori eiaġomani.

### Dudu vaġa-imaima ruaruana (7)

<sup>15</sup>Aneru vaġa-imaima ruaruana (7) na ġena dudu efururuato, benamo garo baregori gubai ġeguruġato, ġekirato, “Tanobara basileiana o veġitaġau seġukana tu ġita ġera Vereġauka ema ġena Keriso ġeri basileiai beiaġo. Be ġia tu bevare-vanaġi vanaġini!” <sup>16</sup>Benamo veġitaġau tauri gabana ruarua ma vasivasi (24), Barau ġoiranai ġeri teronai ġetanuni tarimari, ġevetui-tarito, ġoirari tano ai, Barau ġetoma-rakariġo viniato, <sup>17</sup>ġekirato,

“Vereġauka o, Iaru-korokoro Baraumu,  
otanuni, e otanuto-ġoi,  
ġai na ġoi ġatanikiu-vinimuni,  
korana ġoi ġemu seġuka baregona oġabiato,  
e ġemu Basileia o veġitaġau tu varau osinaiato.

<sup>18</sup>Tanobara irauirau beseri ġebaruto,  
benamo ġoi ġemu baru ma beraġasi.  
Mase tarimari kota-viniri taimina,  
ema mo peroveta tauri,  
ġoi ġemu vetuġunaġi tarimari,  
e ġemu tarima veaġari,  
ema ġoi aramu ġematauraiani tarimari keiri baregori voiri viniviniri  
ġarona,  
ema tanobara ġevaġa-rakavaiato tarimari vaġa-rakavari ġarona  
beiaġoma.”

<sup>19</sup>Benamo Barau ġena Rubu Veaġa guba nuġanai evekeoto, benamo ġena Kiraġitore Mauġana Rubu Veaġa nuġanai efororito aġitaiato. Benamo kiriku-ġaita, e garo gururi tari, e guba eguruato guruna baregona, e tano-iaga, ema aisi foreri asikeikeiri ġeiaġomato.

### Vavine ema ġuġaia kavana dagarana asikeikeina

**12** <sup>1</sup>Benamo nuġa-farevaġi vetoġana baregona ta gubai efororito: Vavine ta, ġaro na evedabuġato, ma ġue tu kwakuna gabureri ai, ema visiġu gabanana ruarua (12) tu korona noġa, ġia debanai ġevetore-ġeġeraġito. <sup>2</sup>Ġia tu ma banina, ma dori eġabito-ġoi, moġesina nai mero-ġabi midiguna eġabiato, be eġabato-ġoi.

<sup>3</sup>Benamo nuġa-farevaġi vetoġana ta gubai ma efororito: Ġuġaia kavana dagarana asikeikeina ta, kakakakana, debana mabarari tu imaima ruarua

(7), guduna mabarari tu gabanana (10), ema korona maki 7 debana tata iatari sebori-sebori torekau. <sup>4</sup>Ĝia ĝiĝuna guba visiĝuri toiri-toiri ĝerina sebori-sebori tu tanobara ĝana eiari-firiĝorito. Ĝia tu mo vavine, dori eĝabito-ĝoi, ĝoiranai eruĝato, beĝabini nai, asikauna mero misina bene ĝabia, bene ĝania uranai. <sup>5</sup>Vavine eĝabito nai tu, mero evaĝa-ĝoraiato. Mo mero na tanobara irauirau beseri mabarari auri togoina na roĝo beĝori-kaurini ma seĝukana baregona ĝesi. Benamo mero emaĝurito nai ĝeraga-ĝabi-veĝitaiato, Barau e ĝena terona ĝoirana ĝana ĝeĝwa-iaĝoato. <sup>6</sup>Mo vavine tu Barau na ĝena erovina-toreato gabuna tano fakana ĝana egari-iaĝoto. Monai beĝe nariani e beĝe ĝubuanu ĝaro mabarari 1,260 nuĝari ai.

<sup>7</sup>Benamo gubai vetari ta eĝorato: Maikolo ma ĝena aneru ĝesi ĝuĝaia kavana dagarana asikeikeina ĝevetari-viniato, benamo ĝuĝaia ma ĝena aneru na maki ĝia ma ĝevetari-vinirito. <sup>8</sup>Senaĝi ĝuĝaia kavana dagarana tu asi ekokoreto, naima gubai asi ĝeri gabu ai ĝevaĝa-iaĝorito. <sup>9</sup>Mo ĝuĝaia kavana dagarana asikeikeina, irau laĝani veĝata motana, arana “Diabolo” o “Satani”, tanobara mabarana eĝofaiato dagarana, tu ĝedori-rosiato, e tanobarai ĝefiu-riĝoato. Ĝena aneru mabarari maki ĝia ĝesi ĝefiu-riĝorito.

<sup>10</sup>Benamo gubai garo baregona ta eguruĝato aseĝaĝiato, ekirato, “Toma ĝita ĝera Barau ĝena vevaĝa-maĝuri, e ĝena seĝuka, e ĝena veĝitaĝau baregona, ema ĝena Keriso ĝena maoro baregona varau beraĝasi. Korana Barau ĝoiranai ĝita tari-kakara boĝi-laĝani evaĝa-daĝarito-ĝoi dagarana tu varau beĝe fiu-riĝoa. <sup>11</sup>Ĝia tu tarikakara na Mamoe Natuna, (ginitaĝo mamoen), rarana ema ĝia ĝena guruĝa moĝoniri ĝevari-fiurito-ĝoi, moĝerina ĝekokoreto, be ĝevaĝa-ketoato. Ĝeri maĝuri asi ĝetuĝamaĝi-kaurito, eiaĝoto mo, ĝea maseto. <sup>12</sup>Guba o, ema gubai ĝotanuni tarimami o, boĝono iaku! Senaĝi tanobara e daĝaru-bara ĝomi tu vetuĝami kika! Korana Satani tu ĝomi ĝemi ai varau beviriĝosi, nuĝana tu baru na bevonuvonu-raĝe, korana ribana, ĝia ĝena nega tu varau bekubi-rakava.”

<sup>13</sup>Mo ĝuĝaia kavana dagarana eribato, ĝia tu tanobarai ĝefiu-riĝoato neganai, mero evaĝa-ĝoraiato vavinena murina na ekureto. <sup>14</sup>Senaĝi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ĝana bene rovo-iaĝo uranai. Ĝia monai tu laĝani toitoi ma kwana beĝene naria ema beĝene ĝubu-tanua ĝana. Korana monai tu ĝuĝaia, mo mota rakavana, na asi ilaila beĝabikaraiani. <sup>15</sup>Benamo ĝuĝaia, mota rakavana, bokana na nanu evaĝa-ĝaru rosiato noĝa ĝabata kavana. Ĝia eurato mo vavine tu mo ĝabata na bene ĝaru-kwareĝaia etato. <sup>16</sup>Senaĝi tano na mo vavine evaĝa-kavaiato, korana tano evekeoto, benamo ĝuĝaia bokana na eraka-rosito ĝarukana mabarana eboĝeato. <sup>17</sup>Benamo ĝuĝaia kavana dagarana na mo vavine

ebaruvini-rakavaiato, benamo eiaġoto, mo vavine besena, Barau ġena taravatu guruġari ġekorana-iaġirito-ġoi ema Iesu ġena vevarifitu guruġari ġevaġa-moġonirito-ġoi tarimari mabarari evetari-vinirito. <sup>18</sup> Benamo ġuġaia tu kone ai ea ruġato.

**Davara na vevaġa-rakava dagarana ebere-  
rosito, moġa tu Keriso ġofaġofana**

**13** <sup>1</sup> Benamo au na vevaġa-rakava dagarana ta aġitaiato, daġaru-bara na eraka-raġeto. Ġia guduna mabarari tu gabanana (10), e debana mabarari tu imaima ruarua (7). Korona mabarari tu gabanana (10). Moġeri korona tu ġia guduna tata ġeri ai, ma debana tata ġeri ai tu Barau vaġa-rakavana arana. <sup>2</sup> Mo vevaġa-rakava dagarana aġitaiato, moġa ġitaġitana tu lepadi noġa, (lepadi tu taiga noġa), a kwakuna tu bea kwakuri kavana, ema bokana tu laion bokari kavana. Benamo ġuġaia kavana dagarana asikeikeina tauġena ġena seġuka, ġena terona, ema ġena maoro eġabirito, mo vevaġa-rakava dagarana eviniato. <sup>3</sup> Vevaġa-rakava dagarana debana tai tu giri baregona ta, ġevaġi-maseato girina, senaġi mo manuġa baregona tu enamoto. Tanobara tarimari mabarana mo vevaġa-rakava dagarana ġenai nuġari ġefarevaġi-rakavato, benamo ġia murinai ġerakato. <sup>4</sup> Tarimarima mabarari na ġuġaia ġetoma-rakariġo viniato, korana ġia ġena seġuka tu mo vevaġa-rakava dagarana eviniato. Ema vevaġa-rakava dagarana maki ġetoma-rakariġo viniato, ġevedanaġito, ġekirato, “Dei tu mai vevaġa-rakava dagarana kavana? Dei na ġia bevetari-viniani riba?”

<sup>5</sup> Mo vevaġa-rakava dagarana tu maoro eviniato tu, veiavi guruġari ema Barau vaġa-rakavana guruġari bene kiraġiri ġana, ema ġue gabana vasivasi ma ruarua (42) nuġari ai ġena maoro bene ġauvei-iaġiri. <sup>6</sup> Benamo muruna ekeoato, ma Barau vaġa-rakavana guruġari ekiraġi-matamato; Barau arana ema ġena tanu gabuna ekira-rakavarito, ema gubai ġetanuni tarimari mabarari evaġa-rakavarito. <sup>7</sup> E maoro eviniato, Barau ġena veaġa tarimari bene vetari-viniri nuġanai bene kokore, be ġia bene vaġa-darereri ġana. Ema seġuka eviniato, doġoro mabarari, e bese mabarari, e garo mabarari, ema tanobara mabarari bene ġori-kauri ġana. <sup>8</sup> Tanobarai ġetanuni tarimari mabarari na ġia beġe toma-rakariġo viniani. Maiġeri tarima tu, Barau na tanobara roġosi bere veia veġata, arari mo Mamoe Natuna, ġevaġiato dagarana, ġena maġuri bukanai arari asi etorerito tarimari.

<sup>9</sup> Ma seġana tarimana tu bene seġaġi. <sup>10</sup> Barau beurani dibura numanai beġene baru-taria betoni tarimana tu, dibura numanai beġe baru-tariani veġata. Barau beurani vetari baġana na beġene vaġi-masea betoni tarimana tu, vetari baġana na beġe vaġi-maseani. Maiġeri guruġa na Barau ġena tarima veaġari evaġa-guruġarini, beġene vevaġa-gwaġiġi, ema ma ġeri vetuġamaġikau ġesi beġene tanu.

**Vevaġa-rakava dagarana vaġa-ruaruana, moġa  
tu peroveta tarimana ġofaġofana**

<sup>11</sup> Moġa murinai au na vevaġa-rakava dagarana ta ma aġitaiato, tano na everaġa-raġeto. Ġia guduna tu ruarua, Mamoe Natuna guduna kavana, ema ġia tu ġuġaia kavana eguruġato-ġoi. <sup>12</sup> Ġia na vevaġa-rakava dagarana giniguinena moġa aranai ġena maoro e seġuka mabarari eġauvei-iaġirito. Ma ġia na tanobara tanu-iaġina tarimari mabarari elau-naġirito, mo vevaġa-rakava dagarana giniguinena, debana giri baregona, ġevaġi-maseato girina, manuġana enamoto dagarana, beġene toma-rakarigo vinia etato. <sup>13</sup> Mai vevaġa-rakava dagarana vaġa-ruaruana mainana veġa boruri baregori ema vetoġa irauri tari eveirito-ġoi. Ta tu, ġia na tarimarima mabarari ġoirari ġutuġutunai karava guba na evaġa-mariġoato. <sup>14</sup> Ġia tu vetoġa boruri kotari eviniato, mo vevaġa-rakava dagarana giniguinena ġoiranai eveirito, tanobarai ġetanuni tarimari eġofa-darererito. Ma ekirarito, mo vetari baġana na ġevaġa-beroato, ma toma roġo emaġuri-tanuni vevaġa-rakava dagarana, moġa gubakauna ġana tu vetoġana dagarana o laulauna ta beġene veia, benamo ġene vaġa-ruġa-vaizia etato. <sup>15</sup> Mo vevaġa-rakava dagarana vaġa-ruaruana tu seġuka eviniato, vevaġa-rakava dagarana laulauna giniguinena moġa iaġa bene vinia, be bene guruġa, ema mo vevaġa-rakava dagarana laulauna asi ġeurani toma-rakarigo-vinina tarimari mabarari bene vaġi-maseri ġana.

<sup>16</sup> Benamo tarimarima mabarari, misiri e baregori, ma ġeri farefare ġutuma tarimari e asi ġeri farefare tarimari, tuġu-rakaorakao tarimari e fakai ġetanuni o dia tuġu-rakaorakao tarimari, etuġu-naġinaġirito vetoġa o maka ta ġimari aroribari ai o bakuri ai beġene ġabia etato. <sup>17</sup> Moġesi beġene vei, be tarima ta dagara ta asi bene voivoi-kava o asi bene voivoi-iaġi-kavaia, senaġi mo vevaġa-rakava dagarana giniguinena ġena vetoġa o maka, mai tu ġia arana o arana eruġa-boroġiato numerana, ġenai tarimana ġereġana moġo dagara bene voi e bene ġwa-voivoi. <sup>18</sup> Iaunega tu maġa: Nuġa-mama o tuġamaġi-faka tarimana na mo vevaġa-rakava dagarana numerana bene vaġa-gaua, korana mo numera tu tarima ta numerana. Numerana tu maġa: 666.

**Ginitaġo mamoe na evoi-vaġirito tarimari ġeri mari**

**14** <sup>1</sup> Benamo aboġeto tu, Mamoe Natuna ġoiragu ai aġitaiato, Siona Ġoronai eruġa-taġoto-ġoi, ema ġia sevinai tarimarima 144,000 ġeruġa-taġoto-ġoi. Bakuri ai tu ġia arana ema Tamana arana ġevetoreto. <sup>2</sup> Benamo guba na garo ta ġaruka vovoka ġeġaru-gwadani gururi ema guba eguruani guruna noġa aseġaġirito. Mo guru tu noġamo hap ġelauni tarimari na ġeri hap ġelaurito-ġoi gururi kavana. <sup>3</sup> Ġia tu mo terona, e maġuri dagarari vasivasi (4), ema veġitaġau tarimari baregori ġoirari ai

mari variḡuna ta ḡemariato. Tarima ta na mo mari moḡa marimarina tu asi bedoḡariani riba, senaḡi mo tanobara na ginitaḡo mamoe na evoi-vaḡirito tarimari 144,000 ḡereḡari na moḡo. <sup>4</sup>Mai tarima maiḡeri tu vavine ḡesi asi ḡekimato o asi ḡeveḡura-vanaḡito, be asi ḡemiroto, ḡia tu tauḡeri ḡevenaumato, be ḡia tu namo vedaurea. ḡia tu Mamoe Natuna aiḡana aiḡana eiaḡoni nai, murina na ḡerakani. Tarimarima vekaravari ai ḡia tu Barau na evoirito, ma Barau ema Mamoe Natuna ḡeri tarimarima giniguineri ai ḡeiaḡoto. <sup>5</sup>Mururi na ḡofaḡofa guruḡana ta asi ḡekiraḡiato, ḡia ḡeri ai rakava misina ta maki asiḡina ḡinavaḡi.

### Aneru toitoi

<sup>6</sup>Benamo au na aneru ta maia guba e tano fakari na erovoto-ḡoi aḡitaiato. ḡia ḡenai tu Vari Namona, betanu-vanaḡi vanaḡini varina. ḡia na mai Vari Namona tu tanobara mabarari, e doḡoro mabarari, e garo mabarari, ema bese mabarari tanobarai ḡetanuni ḡeri beḡene vari-fiua ḡana. <sup>7</sup>Eguruḡa-fararato, ekirato, “Barau garina boḡono vei ema Barau boḡono vaḡa-raḡea! Korana tu ḡia ḡena vevaḡa-kota aoana tu varau beraḡasi. Guba, e tanobara, e daḡaru-bara, ema nanu eḡaruani gaburi eveirito Barauna boḡono toma-rakariḡo vinia.”

<sup>8</sup>Aneru vaḡa-ruaruana murina na eiaḡomato, benamo ekirato, “Beketo, Babulona baregona varau beketo. ḡia na tanobara irauirau beseri mabarari ḡia ḡena veḡura-vanaḡi wainina gwaḡiḡina evaḡa-niurito.”

<sup>9</sup>Ma aneru vaḡa-toitoina ḡia murina na eiaḡomato, benamo eguruḡa-fararato, ekirato, “Bema tarima ta na mo vevaḡa-rakava dagarana ema iouiouna dagarana betoma-rakariḡo viniani, ema ḡena maka bakunai o ḡimanai beḡabi-raḡeani tu, <sup>10</sup>ḡia maki Barau ḡena baru baregona wainina beniuani. Mo baru baregona wainina gwaḡiḡina moḡa tu mabarana Barau ḡena baru kapusina nuḡanai ebubu-ḡuraiato. ḡia tu aneru veaḡari ema Mamoe Natuna ḡoirari ai karava morena e salfa nuḡanai bemidigu-midiguni. <sup>11</sup>ḡia mo karava moreri nuḡanai beḡe midigu-midiguni goḡuna tu beraḡe-vanaḡi vanaḡini asi magona. Ma vevaḡa-rakava dagarana ema ḡia vetoḡana o laulauna dagarana beḡe toma-rakariḡo viniani tarimari o ḡia arana makana beḡe ḡabiani tarimari tu, boḡi-laḡani asi beḡe iaḡaraḡini.”

<sup>12</sup>Mainana Barau ḡena tarimarima veaḡari, Barau ḡena taravatu ḡekorana-iaḡiani ema Iesu ḡenai ḡevetuḡamaḡikauni tarimari, evaḡa-guruḡarini, beḡene vevaḡa-gwaḡiḡi ema beḡene kokore.

<sup>13</sup>Benamo guba na garo ta ma aseḡaḡiato, ekirato, “Maiḡeri guruḡa notoreri: Maitoma beiḡoni tu, Vereḡauka ḡena maḡuri nuḡanai ḡetanuni tarimari beḡe maseni tu beḡene iaku.” Iauka Vevaḡa evaḡa-veseto, “Oi, ḡia tu ḡeri ḡauvei e vekwaraḡi na beḡe iaḡaraḡini, korana tu ḡeri veḡa namori ḡia ḡesi beḡe iaḡo-sebonani.” (Moḡa anina tu, ḡeri vekwaraḡi voina namona beḡe doḡariani veḡata).

### Tanobarai kwakwa ġarona

<sup>14</sup>Benamo aboġe-iaġoto, magube kurokurona ta aġitaiato, ma mo magube kurokurona iatanai tu Tarimarima Natuna noġa tarimana etanuto. Ġia debanai tu golo koronana ta, ma ġimanai tu baġa ġeġevana masakona ta. <sup>15</sup>Benamo aneru ta maia Rubu Veaġa na ema raka-rosito, bena magube kurokurona iatanai etanuto tarimana ekea-farara viniato, ekirato, “Ġemu baġa ġeġevana noġabi-vaizia, benamo ġaniġani dagarari nobasi-vaġiri! Korana kwakwa o basibasi ġarona varau beraġasi, tanobarai ġaniġani tu beġe maġe-ġosi.” <sup>16</sup>Benamo mo magube iatanai etanuto tarimana ġena baġa ġeġevana tanobara iatana na edavevanaġiato, benamo tanobara ġaniġanina ebasi-vaġiato, eġabiato.

<sup>17</sup>Aneru ta maia guba na Rubu Veaġa nuġana na ema raka-rosito. Ġia maki ġimanai tu baġa ġeġevana masakona ta. <sup>18</sup>Aneru ta maia fata veaġana na eiaġomato. Ġia tu karava eġita-ġauato-ġoi aneruna. Ġia eiaġomato, benamo baġa ġeġevana masakona eġabiato aneruna ekea-farara viniato, ekirato, “Ġemu baġa ġeġevana masakona noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe. <sup>19</sup>Benamo mo aneru na ġena baġa ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea bubu-toġarito. Mo vine ġwari ġefanarini gabuna moġa, mo tu Barau ġena baru ekiraġiani gabuna. <sup>20</sup>Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

### Aneru imaima ruarua (7) ġeri ai vevaġa- midigumidigu dagarari rakavari 7

**15** <sup>1</sup>Benamo gubai vetoġa baregona ta, nuġa-farevaġi dagarana aġitaiato: Aneru 7 aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-kori ginikauani.

<sup>2</sup>Ma davara ta veġia kavana ma karavana aġitaiato. Mo davara sevinai tu mo tarimarima, vevaġa-rakava dagarana ema ġia laulauna dagarana ema ġia arana ekiraġiani numerana ġevaġa-ketorito tarimari, ġeruġa taġoto-ġoi aġitarito. Ġia ġimari ai tu Barau na evinirito hapiri ġeġabi-taġorito-ġoi, <sup>3</sup>ma Barau ġena vetuġunaġi tarimana, Mose, ġena mari ema Mamoe Natuna ġena mari ġemariato-ġoi,

“Vereġauka o, ġoi tu

Iaru-korokoro Barauna,  
 ġemu ġauvei tu barego,  
 asi tau vaġa-ilailana  
 ema namo vedaurea. Ġuru mabarari ġeri Vere o,  
 ġoi ġemu dabara tu iobukaiobuka ema moġoni veġata.

<sup>4</sup> Vereġauka o, deikara na ġoi asi begari-vinimuni,  
 ma ġoi aramu asi bevaġa-raġeani?

Korana tu ġoi moġo ġereġamu veaġa.  
 Tanobara mabarari tarimari beġe iaġomani,  
 benamo ġoi beġema toma-rakarigo vinimuni.

Korana tu ġemu veġa iobukaiobukari varau beġema fofori.”

<sup>5</sup> Maiġa murinai au aboġe-iaġoto, benamo gubai Rubu Veaġa, mo tu Barau na ġena guruġa moġoniri evaġa-foforirini farai numana veaġana, evekeoto aġitaiato. <sup>6</sup> Mo aneru imaima ruarua (7), ġeri ai tu tarimarima vaġa-midigumidiguri dagarari rakavari; farai numana veaġana na ġeraka-rosito, dabuġa gwaġiġiri namori ema veġia-veġiari na ġevedabuġato, ema kobari ai tu golo beletari ġetore-ġeġeraġirito. <sup>7</sup> Benamo mo maġuri dagarari vasivasi vekaravari ai ta na mo aneru 7 golo diġuri 7 evinirito. Mo golo diġuri tu tanu-vanaġivanaġi Barauna ġena baru na evaġa-vonu fokafokarito. <sup>8</sup> Benamo mo Rubu Veaġa tu Barau marevana goġuna ema seġukana goġuna na evaġa-vonuato. Tarima ta Rubu Veaġa nuġanai asi roġo beraka-toġani riba, beiaġoni mo, tarimarima vaġa-midigu-midiguri dagarari rakavari 7 beġe korini vau.

### Barau ġena baru diġu imaima ruarua (7) nuġari ai

**16** <sup>1</sup> Benamo garo baregona ta Rubu Veaġa nuġana na eiaġomato aseġaġiato. Mo garo na tu aneru 7 evaġa-guruġarito, ekirato, “Goiaġo, Barau ġena baru na evaġa-vonurito diġuri 7 maniġeri tanobara iatanai ġoa bubu-firiġori.”

<sup>2</sup> Aneru giniguinena eiaġoto, ġena diġu tanobara iatanai ea bubu-kauato. Benamo manuġa ġitaġitari rakava kwaikwairi ma midiguri maki asikeikeiri vevaġa-rakava dagarana ġena vetoġa o maka ġeġabiato ema ġia iouiouna dagarana ġetoma-rakarigo viniato tarimari na ġeġoitaġorito.

<sup>3</sup> Aneru vaġa-ruaruana ġena diġu tu davarai ebubu-riġoato. Benamo mo davara tu mase tarimana rarana kavana eveito, ma nuġanai maġuri ġetanuni dagarari mabarari ġemaseto.

<sup>4</sup> Aneru vaġa-toitoina ġena diġu tu ġarukai ema nanu eġaruani gaburi ai ebubuato, benamo rarai ġeiaġoto. <sup>5</sup> Benamo nanu eġita-ġauani aneruna garona aseġaġiato, ekirato,

“Veaġa Baraumu,  
 ġoi tu tovtovonai otanuto-ġoi,  
 ema initoma maki otanuni.



Ġoi ġemu kota-vini ġauveina tanobara tarimari ġeri ai maiġesina  
oveiani tu maoro korikori moġo.

6 Korana ġia na ġoi ġemu tarimarima veaġari ema peroveta tarimari  
rarari ġevaġa-rigorito.

Moġesina naima ġeri veiġa lorinai,  
be rara boviniri beġe niu.”

7 Benamo Barau ġena fata veaġana na garo ta eiaġomato aseġaġiato,  
ekirato,

“Vereġauka o, ġoi tu moġoni veġata Iaru-korokoro Barauna,  
ġemu kota-vini ġauveiri tu dabara moġoninai ema maoronai  
oveiani.”

8 Aneru vaġa-vasivasina ġena diġu tu ġaro iatanai ebubu-kauato.

Benamo ġaro seġuka eviniato, tarimarima karava na bene ġarari ġana.

9 Benamo mo ġaro seġukana gugurana baregona na tarimarima eġararito.  
Ma monana tarimarima tu asi ġevetuġamaġi-kureto, benamo Barau asi  
ġevaġa-raġeato, ne ġia na tu Barau arana ġevaġa-rakavaiato. Barau tu ma  
ġena maoro baregona maiġeri midigumidigu dagarari rakavari bevaġa-  
ġorarini e asi bevaġa-ġorarini.

10 Aneru vaġa-imaimana ġena diġu tu vevaġa-rakava dagarana  
ġena terona iatanai ebubu-kauato, benamo ġena veġitaġau gabuna tu  
emukuna-furufuruto. Benamo tarimarima midigumidigu baregona na  
eġabirito, ma meari ġekafu-taririto. 11 Mo midigumidigu ema manuġa  
dairi ai, ġia na gubai etanuni Barauna ġevaġa-rakavaiato. A ġia tu asi  
ġeurato ġeri veiġa rakavari ġerina beġene vetuġamaġi-kure.

12 Aneru vaġa-imaima sebonana (6) ġena diġu tu Eufrate ġarukana  
baregona nuġanai ebubu-ġuraiato. Benamo mo ġaruka baregona eroroto,  
ġaro eraġeni rekena na kini (ma ġeri vetari doġorori ġesi) beġe iaġomani,  
moġeri ġeri dabara evaġa-fakaiato. 13 Moġa murinai iauka rakavari toitoi  
faraġeġo noġa moġo aġitarito. Ta tu dagara ta ġuġaia kavana, (mai tu  
Satani), bokana na ema raka-rosito, ta tu vevaġa-rakava dagarana, (mai  
tu Keriso ġofaġofana), bokana na ema raka-rosito, ma ta tu peroveta  
ġofaġofa tarimana bokana na ema raka-rosito. 14 Mo iauka moġeri tu  
demoni iaukari, ġia na vetoġa iraurauri ġeveirito-ġoi, ema ġeiaġoto  
tanobara mabarana kiniri ġeri ai, beġenea vaġa-vegogori, be Iaru-  
korokoro Barauna ġena ġaro baregonai tu Barau beġene vaġa-vevaġia  
ġana.

15 “Noseġaġi! Au tu lema tarimari kavana baiaġomani! Bevaġa-noga-  
taġoni ema ġena dabuġa kefinai bevei-taġorini tarimana tu bene iaku.  
Korana ġia tu kefina kori asi beiaġoni, benamo ġutuma-bara nuġanai asi  
bemaiakaiani.”

16 Benamo demoni iaukari toitoi na kini mabarari ġeġori-vegogorito  
gabuu tai, Heberu garori ai mo gabu arana tu Amagedon.

<sup>17</sup>Aneru vaḡa-ima<sup>1</sup>ma ruaruana (7) ḡena diḡu tu guba fakanai ebubuato, benamo Rubu Veaḡa nuḡana na garo baregona ta terona na eiaḡomato, ekirato, “Varau bekor<sup>1</sup>!” <sup>18</sup>Benamo kiriku eragato, e garo gururi tari ḡeraḡeto, e guba eguruato, ema tano-iaga baregona eragato. Tarimarima tanobarai ḡetanu-guineto, monana beiaḡoma mo initoma moḡesi tano-iaga ta tu asi eḡorato. Moḡa tu tano-iaga barego lelevaḡina veḡata. <sup>19</sup>Benamo vanuḡa baregona evetavito, tavi toitoi ḡevetoreto, ema tanobara mabarari vanuḡari maki ḡeḡwa-kafu kafurito. Barau na vanuḡa baregona Babulona ma etuḡamaḡi-ḡenoḡoiato, benamo Barau ḡena baru ema nuḡa-ḡirimaḡirima wainina na evaḡa-vonu fokafokaiato kapusina eviniato, bene niua ḡana. <sup>20</sup>Benamo motumotu mabarari ḡeraga-rekwarekwato ema ḡoro maki ḡerekwarekwato, be asiḡina. <sup>21</sup>Ma guba na aisi, fore noḡa asikeikeiri, ḡeri meto tu pauna sinau sebona (100) kavana, tata tarimarima iatari ai ḡeketokauto. Benamo mo tarimarima na Barau guruḡa rakavari ḡeviniato-ḡoi, korana mo aisi, fore noḡa asikeikeiri, iatari ai ḡeketokauto-ḡoi dainai. Korana mo vevaḡa-midigumidigu dagarana rakavana moḡa tu rakava kwaikwaina.

### Babulona - veḡura-vanaḡi vavinena baregona

**17** <sup>1</sup>Benamo mo diḡu imaima ruarua (7) ḡeḡabi-taḡorito-ḡoi aneruri fakari ai ta tu au rekegu ḡana eiaḡomato, benamo au ema vaḡa-guruḡaguto, ekirato, “Noiaḡoma, be veḡura-vanaḡi vavinena baregona ḡena veḡura-vanaḡi voina metona beḡabiani metona navaḡa-ḡitam<sup>1</sup>u. Ḣia tu nanu vovoka iatari ai etanuni. <sup>2</sup>Tanobarai ḡetanuni vereri baregori o kiniri mabarari tu ḡia ḡesi ḡeveḡura-vanaḡito. Ema tanobarai ḡetanuni tarimari maki ḡia ḡena veḡura-vanaḡi wainina na ḡeniu-babobaboto.”

<sup>3</sup>Benamo Iauka Veaḡa na eboroḡiguto, aneru ta na eḡwa-rakaguto, tano fakana ḡana eḡwa-iaḡoguto. Monai vavine ta aḡitaiato, vevaḡa-rakava dagarana kakakakana ta iatanai etanu-taḡoto-ḡoi. Mo vevaḡa-rakava dagarana tauḡanina tu Barau vaḡa-rakavana arari ḡevaḡa-vonuato. Ḣia debana mabarana imaima ruarua (7), ema guduna tu gabanana (10). <sup>4</sup>Mo vavine tu dabuḡa kakakakari ema koturi kakakakari o pepolori namo vedaureari eriḡoto, ema golo e fore nauḡanauḡari ema aḡeva ma marevari na everato. Ḣimanai tu golo kapusina ta eḡabiato. Mo golo kapusina tu veḡa rakava kwaikwairi ema ḡena veḡura-vanaḡi mirori na evonu-fokafokato. <sup>5</sup>Ḣia bakunai tu ara ta ḡeberaiato, anina maki vekuretoḡa, maiḡesi ḡetoreato, “Babulona barana, veḡura-vanaḡi sinari ema tanobarai veḡa rakava kwaikwairi mabarari sinari.” <sup>6</sup>Benamo au na mo vavine aḡitaiato, Barau ḡena tarimarima veaḡari, ḡevaḡi-maserito tarimari, rarari eniurito, be eniu-babobaboto. Mo tu Iesu ḡevaḡa-moḡoniato-ḡoi nai, ḡevaḡi-maserito tarimari rarari. Au na ḡia aḡitaiato nai, aḡaba-rakavato.

<sup>7</sup>Benamo mo aneru na ekiraguto, ekirato, “Goi tu kara dainai oġaba-rakavani? Mani vavine maniġa varina vekuretoġana ema mani vevaġa-rakava dagarana iatanai berāġe maniġea, mani debana 7 ma ġena gudu 10, varina vekuretoġari tu nakiravara-ġinikaumu. <sup>8</sup>Mo vevaġa-rakava dagarana boġitaia, moġa tu guinenai etanuto-ġoi, ma ġia toma tu asi tauna. Ġia tu tano gabigabina guri variġo kwareġana na bema raka-rosini, benamo beiaġoni gabuna rakava kwaikwaina, midigumidigu baregona bea ġabiani. Tanobarai ġetanuni tarimari, Barau na tanobara eveiato monana veġata arari maġuri bukanai asi etorerito tarimari, na mo vevaġa-rakava dagarana ġeġitaia to nai tu, nuġari ġefarevaġi-rakavato. Korana ġia tovotovonai tu etanuto-ġoi, ma toma tu asi tauna, senaġi ġia tu ma beiaġomani.

<sup>9</sup>Iaunega tarimana na maiġa bene tuġamaġi-fakaia. Mo deba 7 tu mo vavine etanukauni ġorori 7. <sup>10</sup>Ma ġia aniri ta maki vere baregori o kini 7. Vere barari imaima tu ġeketoto, sebona tu roġo eruġa-taġoni, ma ta tu roġosi bene iaġoma. A ġia beiaġomani tu, mai tanobarai asi betanu-maukani. <sup>11</sup>Mo vevaġa-rakava dagarana guinenai etanuto-ġoi, ma initoma ġia tu asi tauna, maniġa tu kini vaġa-imaima toitoina (8). Ġia tu mani vere baregori o kini 7 karori ta, ma ġia tu beiaġoni gabu rakava kwaikwaina midigumidigu barego bea ġaniani.

<sup>12</sup>Mo gudu 10 oġitarito, moġeri mo tu kini 10. Ġia tauri 10 tu kini dagina ema beġe ġita-ġaurini tano-barari roġosi beġene ġabiri. Senaġina ġia tu aoa sebona mo vevaġa-rakava dagarana ġesi kini kavana veġitaġau maorona baregona beġe ġabiani. <sup>13</sup>Gia ġeri tuġamaġi tu sebona moġo, ema ġeri seġuka e maoro baregona tu mai vevaġa-rakava dagarana beġe viniani. <sup>14</sup>Gia na Mamoe Natuna beġe vetari-viniani, senaġi Mamoe Natuna na bevaġa-ketorini, korana ġia tu vere mabarari ġeri Vere, ema kini mabarari ġeri Kini. Ema ekearito e eġabi-viriġirito ema ma vetuġa-maġikauri ġesi ġia murinai ġerakani tarimari maki ġia ġesi beġe kokoreni.”

<sup>15</sup>Benamo mo aneru na ekiraguto, ekirato, “Mo veġura-vanaġi vavinena etanu-taġoni nanuri boġitari, moġeri tu tanobara beseri, tarima ġutuma gorogoro, tanobara irauirau tarimari, ema garo irauirau tarimari boġitari. <sup>16</sup>Mo vevaġa-rakava dagarana ema mo gudu 10 boġitari dagarari, mani veġura-vanaġi vavinena tu beġe iau-rakavaiani. Ġia na asi ġena farefare ai beġe vaġa-iaġoani, e dabuġana ġenana beġe fuki-vaġirini, tauġanina kori beġe vaġa-rakaiani; viriġona beġe ġaniani ema karavai beġe gabu-raġeani. <sup>17</sup>Korana Barau na maniġeri kini nuġari ai evaġa-urato, ġia ġena ura beġene veia etato. Moġesina naima ġia maki ġeurato nai, ġeri seġuka mo vevaġa-rakava dagarana beġene vinia, be bene veġorikau, bene iaġo mo, Barau ġena guruġa mabarari beġenea ġuġuru. <sup>18</sup>Ema mo boġitaia vavinena tu vanuġa baregona. Ġia na tanobara vereri o kiniri mabarari eġori-kaurini.”

## Babulona beketoni

- 18** <sup>1</sup> Maiġa murinai aneru ta ma ġena seġuka baregona ġesi guba na emariġoto aġitaiato. Ġia marevana mamana na tanobara emama-vaġa-ġauato. <sup>2</sup> Benamo tuġana maki asi ekoġoto, ekirato, “Beketo! Vanuġa baregona Babulona tu beketo!  
Ġia tu demoni ġeri tanu gabunai beiaġo, e iauka rakavari ema iauka mirori, e manu rakava kwaikwairi ġeri tanutaġo gabunai beiaġo.
- <sup>3</sup> Korana tu bese mabarari na ġena wain ġeniuato nai ġevei-babobaboto; mo wain tu ġena veġura-vanaġi ġauveiri. Tanobarai ġetanuni kiniri mabarari tu ġia ġesi ġeveġura-vanaġito, ema tanobarai dagara ġeġwa-voivoirini tarimari maki ġia ġena farefare namori ġerina farefare vovoka tarimari ai ġeiaġoto.”
- <sup>4</sup> Moġa murinai tu guba na garo ta eiaġomato ma aseġaġiato, ekirato, “Ġegu tarima mabarami, mai vanuġa baregona ġenana ġoma raka-rosi. Be ġia ġena vei-rakava veiġari asi boġono veiri, ġia na vevaġa-midigumidigu dagarari rakavari beġabirini dagarari ġomi na asi boġono ġabiri.
- <sup>5</sup> Korana ġia ġena vei-rakava tu iatai-iatai bevesenu-senukau, bevaraġe mo, guba vanuġana maki bea doġaria. Senaġi Barau na ġena veiġa, asi maorori dagarari, etuġamaġi-taġorini, asi etuġa-rekwarini.
- <sup>6</sup> Ġia na ġomi evinimito ilailana ma boġono vini-vaġa-voia. Ġena veiġa voina ilailana moġa boġono vaġa-ruaia, benamo boġono vinia. Niuniu wainina kapusi sebona ġomi evinimito nai tu, ġena kapusi korikori ai niuniu wainina moġa nuġanai ta maia boġono bubu-ġuraia, boġono vaġa-ruaia, benamo voina boġono vinia.
- <sup>7</sup> Tauġena eveġabi-varaġeto ema eġani-namoto-ġoi ema etanu-namoto-ġoi ilailanai, midigumidigu boġono vinia ema boġono vaġa-taġitaġia. Ġia nuġanai tu eveiavini, ekirani, ‘Au tu kwini o vere vavinena kavana atanuni. Au tu dia vabu ema asiġina ġinavaġi bataġi-vanoro vanoroni.’
- <sup>8</sup> Moġesina naima ġia tu ġaro sebona nuġanai moġo midigumidigu iraurau na beġe vaġa-ketoani, mo tu mase, taġi-vanorovanoro, ema doġe ġenai beġe raġasini. Ma ġia tu karava na beġaraiani. Korana ġia ġeri rakava voina beviniani Barauna tu Barau Vereġauka, ma ġia tu ma seġukana.”
- <sup>9</sup> Tanobara kiniri, ġia ġesi veġura-vanaġi veiġari ġeveito ema ġia ġesi ġeġani-namoto-ġoi e ġetanu-namoto-ġoi kiniri, na ġia beġaraiani goġuna

beḡe ḡitaiani nai tu, taḡina beḡe veini, ema beḡe taḡi-vanoroani. <sup>10</sup>Ḡia ḡena midigumidigu beḡe ḡitaiani, moḡa garina na manaḡai beḡe ruḡani, benamo beḡe taḡi-guruḡani, beḡe kirani,

“Vetuḡamu! Siti baregona vetuḡamu kekei!

Babulona o, seḡuka rakava sitina!

Ḡoi tu aoa sebona nuḡanai moḡo ḡemu rakava voina metona boḡabia!”

<sup>11</sup>Tanobarai dagara ḡevoivoi-iaḡirini tarimari beḡe taḡini ema beḡe taḡi-vanoroani, korana ḡeri voivoi-iaḡi farefareri tu asi voivoiri tarimana ta. <sup>12</sup>Mo tu ḡeri golo, e silva, e fore namo vedaureari voiri barego foreri, ema aḡeva marevari asi-gadara dagarari; dabuḡa namori gwaḡiḡiri, e dabuḡa kota kakakakari o pepolori, e dabuḡa silikari, ema dabuḡa kakakakari; ma bonari ḡauri, e elefani doḡari na ḡeveirini dagarari irauirauri, e ḡau voiri barego ḡauri na ḡeveirito dagarari, e auri boraborari e auri namori ema mabolo na ḡeveirito dagarari; <sup>13</sup>ḡaniḡani mamiri vaḡa-namori muramurana arana sinamon, e ma bonari muramurari, e goḡu ma bonana eveiani muramurana, e bonana namona muramurana arana muro, e tauḡani ai ḡedauani muramurana arana frenkinsens; vine nanuna, e olive diḡana, farao ema widi, boromakau ema mamoe, hosi ema kariota, ema tarimarima maki. <sup>14</sup>Beḡe kirani, “Ḡau ḡwaḡwana bono ḡabia otato-ḡoi uradikana oveito-ḡoi dagarana tu ḡemuna beveḡita. Ḡemu farefare vovoka ema ḡemu mareva mabarari beḡe rekwa-rekwa, asi bodoḡari-ḡenoḡoirini maia!”

<sup>15</sup>Dagara ḡeḡwa-voivoini tarimari na maiḡeri dagara ḡevoivoi-iaḡirito ema ḡia ḡenana farefare vovoka ḡeḡoitaḡoto, moḡeri tu manaḡai beḡe ruḡani, mo midigumidigu ḡia na beḡabiani moḡa garina. Ḡia tu beḡe taḡi-rakava rakavani ema beḡe taḡi-vanoroni, <sup>16</sup>ema beḡe taḡi-guruḡa guruḡani, beḡe kirani,

“Vetuḡamu! Vanuḡa baregona, vetuḡamu kekei!

Dabuḡa namori gwaḡiḡiri, e dabuḡa kota kakakakari o pepolori, ema kakakakari na ovedabuḡato;

golo kimorekimoreri, e fore namo vedaureari, ema gudugudu marevari asi-gadarana oveiato-ḡoi.

<sup>17</sup>Aoa sebona nuḡanai moḡo ḡemu farefare vovoka tabutabu mabarari benamo beḡema kori-ketovaḡi!”

Bouti baregori ḡeḡwa-ragarini tarimari mabarari, e bouti ai davara na ḡeragani tarimari mabarari, e bouti ai ḡeḡauveini tarimari, ema davara maḡaniri ma dagara tari ḡerina ḡeri-ḡari ḡeḡoitaḡoni tarimari mabarari manaḡai ḡea ruḡato. <sup>18</sup>Benamo eḡaraiato goḡuna ḡeḡitaiao nai tu, maiḡesina ḡekirato, ‘Mai vanuḡa baregona tu irau veḡata, siti ta maiḡesina kavana tu asi etanuto-ḡoi.’ <sup>19</sup>Benamo tano-kauri debari ai ḡebubukauto, ḡetaḡito e ḡetaḡi-vanoro vanoroto, ḡekirato,

“Vetuḡamu kekei! Vanuḡa baregona vetuḡamu kekei!  
Ma ḡeri bouti davarai tarimari tu ḡia ḡena taḡa ḡenana farefare  
vovoka ḡeḡoitaḡoto, ene?

Aoa sebona nuḡanai ḡia tu asi ḡena farefare tai moḡo beiaḡo.

<sup>20</sup> Guba vanuḡana o, ḡia ḡena keto iakuna ḡovei.

Barau ḡena tarima veaḡami,

e apostolo tarimami,

ema peroveta tarimami,

ḡoiaku ḡoverere;

korana ḡomi veiḡa rakavari evei-vinimito dainai, Barau na ḡena  
rakava voina bevinia.”

<sup>21</sup> Benamo aneru kokore rakavana ta na fore ta widi ḡegiro-iaḡirini  
diḡuna baregona ta kavana eḡabiato. Mo fore-diḡuna moḡa eḡabi-vaisiato,  
benamo davarai efu-reiato, benamo ekirato,

“Vanuḡa baregona Babulona tu maḡesi ma baruri ḡesi beḡe  
fiu-tariani,

benamo berekwarekwa-moḡovaḡini,

asi ḡitaḡitanai ma beiaḡoni.

<sup>22</sup> Hap ḡelauni ma mari ḡeḡabini gururi, e ivirikou ḡefururuni  
ema dudu ḡefururuni gururi ḡoi ḡemu maninai asi ma beḡe  
seḡaḡi-ḡenoḡoirini.

ḡauvei namori ma ribari tarimari ḡoi nuḡamu ai asi ma beḡe  
tanu-ḡenoḡoini.

Widi ḡegiro-iaḡirini foreri gururi maki maninai asi ma beḡe  
seḡaḡi-ḡenoḡoirini.

<sup>23</sup> Maninai lamefa mamari asi ma beḡe ḡara-ḡenoḡoini.

Veḡaraḡo variḡu tauna e vavinena garona ta maki maninai asi ma  
beḡe seḡaḡi-ḡenoḡoiani.

ḡoina dagara voivoi-iaḡiri tarimari mai tanobara nuḡanai ḡia tu  
tarima baregori.

ḡoi ḡemu meḡameḡa tovoḡari na tanobara iraurau mabarari  
oḡori-darererito.

<sup>24</sup> Peroveta tarimari e Barau ḡena tarimarima veaḡari ḡevaḡirito  
rarari, ema tanobara iatanai tarimarima ḡevaḡirito rarari  
mabarari maki Babulona vanuḡa baregona nuḡanai ḡea  
ḡoitaḡorito.”

### Kokore marina gubai

**19** <sup>1</sup> Moḡa murinai tu noḡa moḡo tarimarima asisebo-asisebo garori  
gururi gubai ḡekoḡoto-ḡoi aseḡaḡirito, ḡekirato,  
“Haleluia!  
Vevaḡa-maḡuri, e mareva baregona,

- ema seḡuka tu ḡita ḡera Barau ḡena.
- <sup>2</sup> Korana ḡia tu dabara roroḡotonai evevaḡa-kotani ema rakava voini evinini.  
ḡia na veḡura-vanaḡi vavinena baregona vei-rakava voina meto lelevaḡina bevinia.  
Mai veḡura-vanaḡi vavinena na mai tanobara mabarana ḡena veḡura-vanaḡi veḡana na bevaḡa-rakava kwaikwaia.  
Barau na ḡena vetuḡunaḡi tarimari rarari evaḡa-riḡorito ḡaramanai, rakava voina meto lelevaḡina bevinia.”
- <sup>3</sup> Ma ḡekoḡo-ḡenoḡoito, ḡekirato,  
“Haleluia!  
Vanuḡa baregona ḡenana eraḡeni goḡuna tu asi bedokoni,  
mo goḡu tu beraḡe-vanaḡi vanaḡini.”
- <sup>4</sup> Benamo mo veḡitaḡau tarimari gabanana ruarua ma vasivasi (24) ema mo maḡuri dagarari vasivasi ḡevetui-tarito, benamo Barau ḡena teronai tanutaḡo ḡetoma-rakariḡo viniato-ḡoi, maiḡesi ḡekirato, “Amen, Haleluia!”

### Mamoe Natuna ḡena veḡaraḡo verekona

- <sup>5</sup> Benamo mo terona na garo ta eiaḡomato, ekirato,  
“Barau ḡena vetuḡunaḡi  
tarimami mabarami,  
e Barau garina ḡogarini tarimami,  
misina na beiaḡo mo baregona,  
ḡera Barau ḡovaḡa-raḡea!”
- <sup>6</sup> Benamo au na guru ta noḡa moḡo ḡutuma-bara gururi kavana aseḡaḡiato, noḡa ḡaruka ḡutuma ḡeḡaru-gwadani gururi kavana, ema noḡa guba eguruani guruna baregona kavana, ḡekoḡoto-ḡoi, ḡekirato,  
“Haleluia!  
ḡita ḡera Iaru-korokoro Barauna tu roḡo Vere baregona etanuni.
- <sup>7</sup> Mabarara si-iaku, siverere, ema sivaḡa-raḡea,  
korana tu Mamoe Natuna ḡena  
veḡaraḡo ḡarona varau bema raḡasi,  
ema ḡaraḡona maki beḡe ḡabi-torea.
- <sup>8</sup> Dabuḡa kurokurori gwaḡiḡiri namori, namoka-namokana, miro misina ta maki asiḡina ḡinavaḡi na ḡevaḡa-dabuḡaiato.”  
Mo dabuḡa kurokurori gwaḡiḡiri namori tu Barau ḡena veaḡa tarimari ḡeri vei-iobukaiobuka ekiraḡirini.
- <sup>9</sup> Benamo mo aneru na au ekiraguto, ekirato, “Maiḡesi notorea:  
‘Mamoe Natuna ḡena veḡaraḡo ḡani-vegogona uranai ḡekea-kaurito tarimari tu beḡene iaku!’ ” Ma ekiraguto, ekirato, “Mai tu Barau ḡena guruḡa moḡoniri!” <sup>10</sup> Benamo au mo aneru kwakuna koranai avetui-

tarito, natoma-rakariḡo vinia ḡana. Senaḡi ḡia na ekira-ḡoiguto, ekirato, “Maniḡesi tu asi novei! Au maki vetuḡunaḡi tarimagu ḡoi kavana, ema ḡoi tarikakamu Iesu varina guruḡari ḡevaḡa-moḡonirini tarimari kavana. Barau moḡo notoma-rakariḡo! Korana Iesu ḡena vevarifiu guruḡari na tu tarimarima elaunaḡirini, peroveta guruḡari beḡene kiraḡi-foforiri.”

### Hosi kurokuronai eraḡeto tarimana

<sup>11</sup>Ma au aboḡeto, guba evekeoto, benamo ḡoiragu ai hosi kurokuronsa ta aḡitaiato. Mo hosi iatanai eraḡeto tarimana arana tu “Vetuḡamaḡikau” ema “Moḡoni” ḡetato. ḡia tu veiḡa iobukaiobukanai evevaḡa-maoroni ema evetarini. <sup>12</sup>ḡia matana tu karava moreri kavana, ema debanai korona tu asisebo. ḡia ḡenai ara ta evetoreto, mo ara tu ta asi ribana, ḡia ḡereḡana moḡo ribana. <sup>13</sup>ḡia tu rara na evonuto dabuḡana na evedabuḡato, ema arana tu “Barau ḡena Guruḡa”. <sup>14</sup>Guba vanuḡana ḡena vetari doḡorona tu ḡia murina na ḡeraka-naḡi-rakanagito-ḡoi. ḡia mabarari tu dabuḡa gwaḡiḡiri namori, kurokurori ema namoka-namokari na ḡevedabuḡato, ma hosi kurokurori ai ḡeraḡeto. <sup>15</sup>ḡia bokana na tu vetari baḡana raga-rakavarakava ema raka-rosito. Tanobara irauirau beseri tu mai vetari baḡana ma ragana mainana bebasirini. ḡia na auri togoina na beḡori-kaurini ma seḡukana baregona ḡesi. Ma vine ḡwaḡwari ḡefanarini kavana bea fana-taririni. Moḡa mo tu Iaru-korokoro Barauna ḡena baru baregona bevaḡa-raka-rosiani gabuna. <sup>16</sup>Dabuḡa maukana eriḡoato ḡenai ema manininai tu mai ara maiḡa etoreato, “Kini mabarari ḡeri Kini ema vere mabarari ḡeri Vere.”

<sup>17</sup>Benamo au na aneru ta ḡaro nuḡanai eruḡa-taḡoto-ḡoi aḡitaiato. Mo aneru na guba fakana ḡerovoni manuri ekea-farara vinirito, ekirato, “Goiaḡoma, Barau ḡena ḡanivegogo baregonai ḡoma rovo-vegogo. <sup>18</sup>Be tanobara vereri barari viriḡori, e vetari doḡorori ḡeri veḡorikau tauri baregori viriḡori, e kokore lelevaḡi tarimari viriḡori, ema hosi viriḡori e hosi ai ḡeraḡeni tarimari viriḡori, ema tarimarima mabarari, tuḡu-rakaorakao tarimari e fakai ḡetanuni tarimari, tarima keiri e baregori, mabarari viriḡori boḡonoma ḡaniri!”

<sup>19</sup>Benamo au na vevaḡa-rakava dagarana ema tanobara vereri baregori ma ḡeri vetari doḡorori ḡesi vegogotaḡo aḡitarito. ḡia tu hosi kurokuronai eraḡeto tarimana ma ḡena vetari doḡorori ḡesi beḡene vetari-viniri ḡana ḡevevogoto. <sup>20</sup>Senaḡi mo vevaḡa-rakava dagarana ḡeḡabi-tariato, ema peroveta tarimana ḡofaḡofana maki, mai tu nuḡa-farevaḡi vetoḡari boruri vevaḡa-rakava dagarana aranai eveirito-ḡoi tarimana. Mai vetoḡa boruri maiḡeri na vevaḡa-rakava dagarana ḡena maka ḡeḡabiato tarimari ema ḡia vetoḡana o laulauna dagarana ḡetoma-rakariḡoani tarimari eḡofa-darererini. ḡia tauri ruarua tu kou karavana morena asikeikeinai e salfa nuḡanai ḡefiu-ḡurarito. <sup>21</sup>Ma



kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia viriġori ġeġani-ġosiġosirito.

### Laġani 1,000 nuġanai kara beġorani

**20** <sup>1</sup>Benamo au na aneru ta guba na emariġoto aġitaiaito. Ġimanai tu guri variġo kwareġana, (iauka rakavari ġeri dibura), kina, ema tavi ta ġimanai tu seini asikeikeina ta. <sup>2</sup>Ġia na mo ġuġaia kavana dagarana baregona eġabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ġia tu laġani 1,000 moġesi barutarinai betanuni. <sup>3</sup>Ma aneru na eġabiato, guri variġo kwareġanai efiu-ġuraiato, benamo guri eloka-ġauato, ema ekadakada-ġauato. Aneru na Satani moġesina eveiato anina tu, tanobara irauirau beseri asi bene ġofari, bene iaġo mo, laġani 1,000 benea kori. Moġa murinai bekeo-vaġiani, benamo murikai ġaro viravira ta moġo ma betanuni.

<sup>4</sup>Ma terona kotari ma aġitarito. Mo terona iatari ai tu Barau na Kota beġene seġaġi maorona evinirito tarimari ġetanuto. Ma aboġeto tu, Iesu varina guruġari ġevaġa-moġonirito e ġekiraġi-foforirito ema Barau ġena guruġa ġaramanai debari ġebasi-ġuturito tarimari iaukari maġuri aġitarito. Ġia tu mo vevaġa-rakava dagarana ema ġia vetoġana o laulauna ġeveiato dagarana asi ġetoma-rakariġo viniato, ema ġena maka bakuri ai o ġimari ai asi ġevaġa-kafarito. Ġia tu ġemaġuri-ġenoġoito, benamo Keriso ġesi laġani 1,000 ġevereto. <sup>5</sup>Mase na variġisi-ġenoġoi giniguinena tu moġa. Mase tarimari kotari tu asi roġo ġemaġuri-ġenoġoito mo, laġani 1,000 ea korito. <sup>6</sup>Mai mase na variġisi-ġenoġoi giniguinena beġe variġisini tarimari tu beġe iakuni ema vevaġa-namo barego beġe doġariani. Ġia tu mase vaġa-ruaruana seġukana na asi beġabirini. Ġia tu Barau ema Keriso ġeri Rubu Veaġa vereri ai beġe iaġoni, ema Keriso ġesi mo laġani 1,000 nuġanai beġe vereni.

### Satani ġena keto

<sup>7</sup>Mo laġani 1,000 bekorini murinai, Satani tu ġena dibura gabuna na beġe keo-vaġiani, <sup>8</sup>benamo beiaġoni, tanobara irauirau beseri tanobara daiguni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ġia mabarari bea ġori-vegogorini, vetari beġene veia ġana. Ġia mabarabarari beġe vegogoni tu, noġa kone mirina kavana asisebo-asisebo. <sup>9</sup>Tanobarana na beġe raka-iaġoni, benamo Barau ġena tarimarima ġetotoġato gabuna beġea gana-ġeġeraġiani. Mo totoġa gabuna tu Barau na eura-viniani sitina. Senaġi guba na karava emariġoto, benamo Satani ġena vetari doġorori ema ġargarito. <sup>10</sup>Benamo Diabolo, eġofarito tauna, tu karava moreri e salfa kouna nuġanai beġe

fiu-ḡuraiani. Vevaḡa-rakava dagarana ema peroveta tarimana ḡofaḡofana tu monai varau ḡefiu-ḡurarito. Tauri toitoi tu monai mo karava moreri na vanaḡivanaḡi asi dokona asi magona beḡara-tanurini.

### Kota Baregona

<sup>11</sup>Moḡa murinai au na terona kurokurona baregona ema terona iatanai etanuto tarimana aḡitaiato. Tanobara ema guba ḡia ḡoirana na ḡeraka-veḡitato, benamo asi ma ḡeḡita-ḡenoḡoirito. <sup>12</sup>Benamo mase tarimari baregori ema keiri aḡitarito mo terona kurokurona baregona ḡoiranai. Benamo buka tari ekeorito. Mo buka ekeorito murinai tu, buka ta ma ekeoato, maḡuri bukana tu moḡa. Benamo mase tarimari mo buka tari moḡeri ai ḡeri veḡa etore-vanaḡirito ilailari ai Barau na ekota-vinirito. <sup>13</sup>Davarai ḡemaseto tarimari davara na ḡeveriḡisito, e Mase ema mase tarimari iaukari ḡetanuni Gabuna (o Hades) na ḡeveriḡisito. Benamo mabarabarari tata karakara ḡeveirito ilailari ai ekota-vinirito. <sup>14</sup>Benamo Mase ema mase tarimari iaukari ḡetanuni Gabuna (o Hades) na ḡeveriḡisito tarimari tu, karava kouna nuḡanai ḡefiufiu-ḡurarito. Mo karava kouna moḡa, mo tu mase vaḡa-ruaruana. <sup>15</sup>Bema tarima ta arana maḡuri bukanai asi ḡeḡoitaḡoato tarimana tu, mo karava kounai ḡefiu-ḡuraiato.

### Guba ema tanobara variḡuri

**21** <sup>1</sup>Benamo guba variḡuna ema tanobara variḡuna aḡitarito, korana tu guba guinena ema tanobara guinena tu ḡerekwa-rekwato. Davara maki asiḡi. <sup>2</sup>Ma vanuḡa baregona veaḡana aḡitaiato, mo tu Ieruselema variḡuna guba vanuḡana na Barau ḡenana emariḡoto-ḡoi. ḡia tu veḡaraḡo variḡu vavinena ḡaraḡona ḡena ḡevaḡa-dabuḡaiiani ema ḡevaḡa-vera ginikauani kavana. <sup>3</sup>Benamo garo baregona ta aseḡaḡiato terona na eiaḡomato, maḡesi ekirato, “Toma Barau ḡena tanu gabuna tu tarimarima ḡesi, ḡia toma tu tarimarima vefakari ai betanuni. ḡia tu Barau ḡena tarimarimai beḡe iaḡoni, ema Barau tauḡena ḡia sevisiviri ai betanuni, [ema ḡia ḡeri Barau ai beiaḡoni].” <sup>4</sup>ḡia na matari gorari mabarari bedaurini. Mase e taḡi-vanorovanoro e taḡitaḡi guruna ta ema midigumidigu tu beḡe kori-ketovaḡini, korana tu dagara guineri mabarari ḡekorito.”

<sup>5</sup>Mo teronai etanuto Tarimana maḡesi ekirato, “Ḡoḡitaia, au tu dagara mabarabarari avaḡa-variḡu ḡenoḡoirini.” Ma ekirato, “Maḡeri guruḡa tu notore-vanaḡiri, korana mai tu guruḡa moḡoniri ema ḡeri ai boḡo vetuḡamaḡi-dadamaḡini maki.” <sup>6</sup>Ma ekiraguto, ekirato, “Mabarari beḡe kori. Au tu Alefa ema Omega, (giniguinena ema ginigabina), matamana ema dokona. Bokana bekokeni tarimana tu au na maḡuri nanuna, eḡaruḡaruani dagarana, asi voina, baviniani beniuani. <sup>7</sup>Rakava e meto

bevaḡa-darererini tarimana, ḡena kokore voina tu maiḡeri mabarari beḡaunarini, ema au tu ḡia ḡena Barau ai baiḡoni, ema ḡia maki au natugu ai beiḡoni. <sup>8</sup>Senaḡi gari ai asi ḡeruḡa-gwaḡiḡini e asi ḡeveḡabidadamani tarimari, vei-rakava na ḡevevaḡa-miroto tarimari, vevaḡi-deba tarimari, ḡekima-rakaorakaoni tarimari, ḡemeḡameḡani e kwaivakuku ḡetoma-rakarigo viniani tarimari, ema ḡeḡofaḡofani tarimari, mabarabarari ḡeri gabu tu karava moreri e salfa ḡeḡarani kouna. Mai tu mase vaḡa-ruaruana.”

### Ierusalem̄a variḡuna

<sup>9</sup>Ma aneru ta au ḡegu ai eiaḡomato. ḡia tu mo aneru 7 guinenai ḡimari tu diḡu 7, mo diḡu nuḡari ai tu tarimarima vaḡa-midigu-midiguri dagarari oreri na ḡevonuto aneruri ta. ḡia eiaḡomato, benamo au ema kiraguto, ekirato, “Noiaḡoma, be veḡaraḡo variḡu vavinena nama vaḡa-ḡitamu, ḡia tu Mamoe Natuna ḡaraḡona!” <sup>10</sup>Benamo Barau Iaukana na eborogiguto, ma aneru na ḡoro baregona e mauka kenenena ḡana eḡwa-iaḡoguto. Benamo monana vau siti veaḡana, Ierusalem̄a, Barau ḡenana guba vanuḡana na emariḡoto-ḡoi evaḡa-ḡitaguto. <sup>11</sup>ḡia ḡenai tu Barau marevana mamana emamato-ḡoi, ema siti marevana vetoḡana tu fore namoka-namokari voiri asi keikeiri kavana, ema iaspa forena, fore veḡiaveḡiana kavana emamato-ḡoi. <sup>12</sup>ḡia maḡuna tu asikeikeina ema maukana, ma ḡatama bokana tu gabanana ruarua (12). Mo ḡatama-boka 12 tu aneru 12 na ḡeḡita-ḡaurito-ḡoi. Mo ḡatama-boka tata iatari ai tu Isaraela doḡorori tata arari ḡetorerito, mo tu Isaraela doḡorori 12 moḡeri. <sup>13</sup>ḡatama-boka tu toitoi ḡaro eraḡeni rekenai (o east), ma toitoi ḡaro evariḡoni rekenai (o west), ma debana rekenai (o north) toitoi, ema gabina rekenai (o south) toitoi ḡeveirito. <sup>14</sup>Vanuḡa baregona maḡuna tu korana o duḡu foreri 12 iatari ai ḡevaḡa-ruḡa-vaisiato. Moḡeri fore iatari ai tu Mamoe Natuna ḡena apostolo 12 arari tata ḡetorerito, fore ta ara ta, ma fore ta ara ta.

<sup>15</sup>Au ḡesi ḡaguruḡa-guruḡato-ḡoi mo aneru moḡa ḡimanai tu makamaka rulana o vevaḡa-vetovo dagarana, golo na ḡeveiato dagarana. Mo rula monana vanuḡa baregona e ḡatama bokana ema maḡuna bemakarini. <sup>16</sup>Siti ḡevaḡa-ruḡaiato daigunina tu vasivasi (4), e ḡena baḡaka ema mauka tu ilaila. Mo aneru na siti vevaḡa-vetovo dagarana na etovoato, makana eḡabiato tu stadia 12,000 o 2,400 kilomita. ḡia ḡena mauka e baḡaka ema varaḡe maukana tu ilaila moḡo. <sup>17</sup>Maḡuna ḡena barego maki etovoato, makana tu kiubit 144 o 70 mita. Tarimarima ḡeri vevaḡa-vetovo dagarana mo aneru na eḡauvei-iaḡiato tu moḡesina.

<sup>18</sup>Vanuḡa baregona maḡuna tu iaspa, fore marevari asi gadara dagarari, na ḡeragaiato, ema siti tauḡena tu golo namo vedaureari, ekimore-kimorerini galasi maki ḡevanaḡirito golori na ḡeragaiato. <sup>19</sup>Vanuḡa baregona maḡuna

ġevaġa-ruġaiato korana o duġu foreri tu fore namoka-namokari irauirauri na ġevaġa-veraiato: Duġu forena giniguinena tu iaspa forena, vaġa-ruarwana tu safaia, vaġa-toitoina tu kalakedo, vaġa-vasivasina tu emeral, <sup>20</sup>vaġa-imaimana tu sadoniki, vaġa-6-na tu konilian, vaġa-7-na tu krisolait, vaġa-8-na tu beril, vaġa-9-na tu topas, vaġa-10-na tu krisopres, vaġa-11-na tu haiasin, vaġa-12-na tu ametis. <sup>21</sup>Mo ġatama-boka gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na ġeveirito. Ġatama-boka ta pel ta, ġatama-boka ta pel ta. Siti dabarana baregona tu golo namo vedaureana na, noġa galasi kavana na ġeveiato.

<sup>22</sup>Vanuġa baregona nuġanai Rubu Veaġa ta asi aġitaiato, korana Vereġauka, Iaru-korokoro Barauna, ema Mamoe Natuna, ġia tu mo vanuġa barana ġena Rubu Veaġa. <sup>23</sup>Mo vanuġa baregonai ġaro mamana ema ġue mamana tu asi bemamani, korana Barau marevana mamana monai bemamani, ema Mamoe Natuna tu mo siti ġena lamefa. <sup>24</sup>Tanobara mabarana besena tu ġia mamanani beġe rakani, ema tanobara vereri o kiniri mabarari na dagara e farefare marevari namori monai beġea ġwa-toġarini. <sup>25</sup>Ġaro sebona ta maki vanuġa barana ġatama bokana asi beġe biririni, korana mo siti tu boġi na asi beġabi-ġauani. <sup>26</sup>Tanobara irauirau mabarari ġeri farefare marevari ema ġeri taġa mabarana ġia ġena beġea ġwa-toġarini. <sup>27</sup>Dagara ma mirona ta tu asi beraka-toġani, e maiaka ema ġofaġofa veiġari beveini tarimana ta maki asiġina ġinavaġi beraka-toġani. Deidei Mamoe Natuna ġena maġuri bukanai arari etore-vanaġirito tarimari ġereġari moġo beġe raka-toġani.

### Maġuri nanuna ġarukana

**22** <sup>1</sup>Moġa murinai aneru na maġuri nanuna ġarukana evaġa-ġitaguto. Mo nanu tu nega-vaġura-vaġurana galasi kavana. Ma mo nanu tu Barau ema Mamoe Natuna ġeri terona na eġaru-rosito. <sup>2</sup>Siti dabarana baregona nuġana ġana ġeġaru-iaġoto-ġoi. Mo ġaruka rikina reketa-reketai tu maġuri ġauri ġetubuto. Mo ġau tu ġue tata nuġari ai ġwaġwari ġeġorato-ġoi, mai tu laġani sebona nuġanai nega vaġa-12 ġeġwato-ġoi; ema ġau lauri na tanobara mabarari beseri evaġa-namorito-ġoi e evaġa-maġuririto-ġoi. <sup>3</sup>Monana bevesinani beiaġoni, tarima ta iatanai o tanobara iatanai tovoġa ta tu asi ma betanuni. Barau ema Mamoe Natuna ġeri terona tu vanuġa baregona nuġanai, ma ġena vetuġunaġi tarimari na vetuġunaġina beġe iaġo-vinini. <sup>4</sup>Ġia ġoirana beġe ġitaiani, ema ġia arana maki ġia bakuri ai betanuni. <sup>5</sup>Monai boġi tu asiġina. Lamefa ema ġaro mamari ta asi beġe ġitaiani e asi beġe urani, korana Barau, Vereġauka na mama bevinirini. Ema ġia tu vere beġe tanu-vanaġi vanaġini.

### Iesu Vereġauka ma beġenoġoi-iaġomani

<sup>6</sup>Benamo mo aneru na au evaġa-guruġaguto, ekirato, “Mai guruġa tu moġoniri ema ġeri ai maki bovetuġamaġi-dadamaġini. Vereġauka, ġia

Iaukana tu peroveta tarimari mururi na eguruḡani Barauna, ḡena aneru etuḡuato, ḡia ḡena vetuḡunaḡi tarimari kara dori ḡeḡorani dagarari bene vaḡa-ḡitari ḡana. <sup>7</sup>Goseḡaḡi, au tu dori aiaḡosini. Mai buka nuḡanai peroveta guruḡari bekorana-iaḡirini tarimana tu bene iaku.”

<sup>8</sup>Maiḡeri dagara aseḡaḡirito ema aḡitarito tarimana tu au, Ioane maiḡegu. Maiḡeri dagara aseḡaḡirito ema aḡitarito nai tu, ekira-varaguto ema evaḡa-ḡitaguto aneruna kwakuna koranai avetui-tarito, natomarakariḡo vinia atato. <sup>9</sup>Senaḡi ḡia na ekiraguto, ekirato, “Maniḡesi asi novei. Au tu ḡoi, e ḡoi tarikakamu peroveta tarimari, ema mai buka guruḡana ḡekorana-iaḡirini tarimari ḡesi ilaila, Barau vetuḡunaḡina aiaḡo-vinini. Barau notoma-rakariḡo vinia!” <sup>10</sup>Moḡa murinai ekiraguto, ekirato, “Mai bukai peroveta guruḡari asi bono kada-ḡauri, asi bono kure-toḡari, korana nega tu varau bekavinaḡi. <sup>11</sup>Vei-rakava tarimana bene vei-rakava-iaḡo roḡo, veiḡa mirori eveini tarimana veiḡa mirori bene vei-iaḡo roḡo, veiḡa iobukaiobukari eveini tarimana veiḡa iobukaiobukari bene vei-iaḡo roḡo, ema veaḡai etanuni tarimana veaḡai bene tanu-iaḡo.”

<sup>12</sup>Iesu maiḡesi ekirato, “Goseḡaḡi! Au tu dori aiaḡosini! Tarimarima ḡeri ḡauvei voiri tu au ḡegu ai, be aḡwa-iaḡosirini. Tarimarima mabarari ḡeri veiḡa e ḡauvei ilailari ai voiri bavinirini. <sup>13</sup>Au tu Alefa ema Omega, (ḡiniguinena ema dokona), au tu tovtovona veḡata ema magona.”

<sup>14</sup>Geri dabuḡa ḡeḡuriḡirini tarimari tu beḡe iakuni. ḡia tu Barau na maoro bevinirini, maḡuri ḡauna ḡwana beḡe ḡaniani, ema vanuḡa baregona ḡatama bokana na beḡe raka-toḡani. <sup>15</sup>A kwaiva (o vei-rakava tarimari), ḡemeḡameḡani tarimari, ḡekimani e ḡeveḡura-vanaḡini tarimari, vevaḡi-deba tarimari, kwaivakuku ḡetoma-rakariḡo viniani tarimari, ema ḡofaḡofa ḡeuradikani tarimari, mabarabarari tu siti murikanai beḡe tanuni. <sup>16</sup>“Au, Iesu, na ḡegu aneru batuḡu-iaḡosia, ekalesia doḡorori ḡeri mai vari moḡonina ḡomi neasi vaḡa-ribami ḡana. Au tu Davida garakana ema ḡia ḡenana aiaḡomato Tarimagu. Au tu laḡani visiḡuna, ma mamana baregona.”

<sup>17</sup>Iauka Veaḡa ema veḡaraḡo variḡu vavinena ḡekirani, “Noiaḡoma!” Ema beseḡaḡini tarimana maki nekira, “Noiaḡoma!” Bokana bekokeni tarimana bene iaḡoma; ema beurani tarimana, mai maḡuri nanuna, asi voina nanuna, bene niua.

### Guruḡa dokona

<sup>18</sup>Mai bukai peroveta guruḡari beḡe seḡaḡirini tarimari mabarari akira-toreḡaurini: Bema deikara na mai guruḡa iatari ai guruḡa tari betore-kaurini tarimana tu, mai bukai tarima vaḡa-midiguri dagarari, ekiraḡirini dagarari, Barau na ḡia iatanai betore-kaurini. <sup>19</sup>Ma bema tarima ta na mai peroveta bukana na guruḡa tari bekoki-vaḡirini nai, ḡia

tu Barau na voina maḡuri ḡauna ḡenai ema siti veaḡana nuḡanai monai tanu-vanaḡivanaḡi moḡa, mai bukai ekiraḡirini maiḡeri, ḡia ḡenana beḡabi-vaḡirini.

<sup>20</sup>Maḡeri dagara bekiraḡi-foforirini tarimana ekirani, “Oi, au tu dori aiaḡosini!”

Amen. Iesu Vereḡauka o, noiaḡoma!

<sup>21</sup>Iesu Vereḡauka ḡena namo ema varevare-bara ḡomi mabarami iatami ai bene tanu. Amen.